

AHEPERI, EKAPIITULU

YA NEETHANU NA MOSA ²



. . . osoma Masu Awe ooreerexa.

Kiroophiya, okathi vakhani ovinre, nto kaakunxe aBibilia aili. Ni kaahikhalana nvaanelo mukhaani ni muhano mmosa ottuli nno, ni kaahimuleela wira vaakhanle wira kaalaleerya ni oowaili, kaamukhalana yoosoma yooreera saana. Masi ela eleexiku y'Ekreku, vano etthu paahi kintthun'aka osoma mwa yeela, ohiy'ula. Eyo e—eyo e. . . Eyo otaphuleliwa wa nuulumo ni nuulumo, na Ekreku yoopacerya, mw'Enkelesini. Ni onnikhalaka mukhaliheryo muulupale wa miyo vootthara eliinya ela. Nto kintthuna paahi kisome etthu mwa yeeyo, okhala wira vano ninsoma Muliivuruni mu mw'aHeperi, nto vano hiyo ninrweela paahi soohimya s'ekeekhai soowiixerya saana.

219 Ni koomuleela Munna Neville, minuutu vakhani sivinre, “Ninkelela mpantte atthu ansun'aya muru aya ni wira, ‘Miyo nkinaamini iyo.’” Munnona? Eyo t'inamuna onkel'ahu-mo. Ti vaavo ennisivel'aya eyo.

220 Murumeyi mmosa aahikiirela, khwira, “Ahe, kinoona wira onookhala osuna muru vanci-ene.”

221 Miyo khwira, “Ti yeeyo entthun'ahu wira.” Munnona?

222 Bibilia onwerya paahi okhalana yoohimya emosa. Khokhanle okhalanaka soohimya piili. Nto vakhala wira epantte emosa ya Bibilia onihimya etthu emosa, nto epantte ekina ya Bibilia khunahimya etthu ekina, weso yookhala evonyeiye. Munnona? Ohaana ohimya etthu yeeyo, mapuro othene. Masi, muupuwele, mwa omusoma Bibilia, “Owo t'owiipitiheriwa maitho a ale oosuwela ni a miruku, khuupululeliwa axikhaani,” okhala wira ti ya Eliivuru ya muroohoni.

223 Ni Eyo kehiyo eliivuru ya onkela nsuwa. Eyo Eliivuru ya onikhuma nsuwa. Ni eri etthu emosa paahi enwerya otaphulela Eyo, nto eyo ti Erooho Yoowaarya. Koosuwela wira khula mmosa a hiyo ontthuna ahimyeke, wira, “Erooho Yoowaarya enninihimeerya ele enaamini ahu Mmo.” Ahe, vano, vakhala wira khula Yoolempwa ennilikana oratteene, vano eyo ti Erooho Yoowaarya. Yaahilikaneke oratteene, nto khunakhalana ephawu va, ni ephawu va, weso yookhala etthu evonyeiye ni waamini wahu. Ni, oh, Eyo Eliivuru yooreerexa.

224 Vano, kintthuna wira mwiire ela okathi onsom'ahu. Vano, nihaana okhuma oxaaka voosiisu orowa oWyoming, Apwiya yathhuna. Munivekelele.

Ni esuman'ela enrwa, Munna Graham Snelling, va . . . Owo ori vaava. Koomwiiwa, minuutu vakhani sivinre, ahimiyaka muhupi awe. Ni ekerej'ela eri vookhaliheryana saana ni muhakalaliho awe. Ni nininvekela Muluku, wira anvahe muhakalaliho, woowaatta saana, muulupale. Munna Graham aahikhalana muhakalaliho wa Munna . . . wenna oCharlestown, Munna Junior Cash, ni waahikhala orukunxa murima w'atthu emiya emosa, kookupali. [Mutthu mmosa oniira, "Miloko mithanu na miraru n'axexe."—Mol.] Miloko mithanu na miraru n'axexe oorukunxa murima. Tivo, wa yeeyo, hiyo ninninvaha Muluku nttotopelo. Ni ninroromela wira onookhalana imiya thanu ni miloko mithanu na miraru n'axexe nno, nipuro nla nno.

²²⁵ Munna Graham ookumana ni miyo olelo, nto owo khwira, "Vano, Munna Bill, kookupali wira munnisuwela saana wira nkikhanle va wira kipacerye muteko mukina woovirikanya etapernakulu, okhala wira ka mpantte wa etapernakulu." Owo ori va paahi wira . . . Owo onimoona vamurimani vawe wira onthuna okhalana muhakalaliho, nto Apwiya annimuhoolela wira aire. Nto—nto owo onaalattula ale oorukunxa murima, ni ookhalana ekereja, wira aahele-mo, "Va eri ekereja owaani, mwakela vale, murukunxe murima."

²²⁶ Ni owo muteko ahu, ntoko aKristu, omukhaliherya ni sothene sinwery'ahu. Nto Apwiya emureerihe Munna Graham. Ni nyuwo mwa, khula mmosa, oolattuliwa vooreera murima omuthukumanoni wa Munna Graham osulu nno, ni otthuniheriwa wothene wa ekereja ela, ni okhaliheryana wothene wira nimukhaliherye mwa khula enamuna enwery'ahu, mwaha wa minepa sirimenle ni wa Omwene wa Muluku.

²²⁷ Apwiya yooreeriheni, Munna Graham, yoovaheni mithukumano suulupale. Owo khonsuwela liini onrow'awe omaliha. Owo onoopacerya paahi. Nto siiso, Munna Graham aahikhalana ntoko yoomi, sa *vasulu* ni *vathi* sinci-ene. Ti siiso makhalelo ary'aya. Eyo enniwiirihani osiveliwa ni sa *vasulu* numala ovira mwa sa *vathi*. Mutthu amora vale khukhala vaavo, owo namoova. Kinkhalana nrromelo okathi mutthu onivenyaawe khwiilipiha-tho. Ti yeeyo. Kookupali wira munoowerya otaphulela etthu enihimy'aka. Vano, muhiliyale, esuman'ela enrwa.

²²⁸ Vano, Muliivuruni mu mw'aHeperi, khaninrowa okuxa mulipiheryo ene ohiy'ula.

²²⁹ Vano, Ettiminku enrwa, Apwiya yatthuna, Munna Neville onoolaleerya. Munna Cox va, wala amosa-amosa a awo, anoomuhimeerya, navolowa-ru m'okathi wa muthukumano wa Ettiminku enrwa. Owo onoolaleerya muraatiyuni. Ni hiyo na . . . Nyuwo othene mmwiiwe raatiyu awe vano, ni—ni—ni mwaalattule anawaattamanani anyu othene wira emwiiwe. Vekeekhai kinnikhala oosiveliwa wiiwa olaleya waya ni

wiipa, nikhuru n'axexe Neville. Nkinihimya eyo okhala wira owo okilante vaava. Kaahimye-ru iyo, nave kihihimya mmurimani mwaka, kaamukhala namirima miili. Ti yeeyo. Kaahaana olapa. Masi kinihimya yeeyo. Ni kaamwamputi onvaha nsuku na ethutu naanaano va ovikana nleha nothene na ithutu owo oronwe-ene.

230 Emaara emosa kaamukhuma vamukhora vale, nto aahikhala muhano mmosa aarwiye, nto owo khwira, "Munna Branham, oh, moota waakisivenly'aya mutthak'ole!"

231 Miyo khwira, "Kooxukhuru." Khukooniha oreera.

232 Mutthu mukina khurwa, khwira, "Munna Branham, okisivela mutthak'ole."

233 Miyo khwira, "Kooxukhuru."

234 Aahikhala mulaleyi mwaamukhaani vale, a nno epante onkela epheyo w'elapo, mulaponi, owo khwira, "Attotopeliwe Muluku, nkinthuna atthu wiittotopa mwaha wa miyo siisaale."

235 Miyo khwira, "Miyo kinnithuna." Nto miyo khwira, "Yookhala evirikanelo emosa paahi miyo ni nyuwo. Miyo ka naxariya wa yeeyo." Eyo ekeekhaii. Hiyo othene onnisivela wiiwa moolumo ooreera mwaha wa hiyo. Ni miyo—miyo kinoona wira ti yoreera ohimya moolumo ooreera mwaha wa yeeyo. Ni mwaathunaka wira mutthu ahimyeke moolumo ooreera mwaha wa nyuwo, muhimyeke moolumo ooreera mwaha wa mutthu mukina. Eyo t'enamuna yo wira yeeyo, vano okathi wothene munohimya moolumo ooreerexa munwery'anyu w'atthu othene. Ni eyo enimwiirihha nttheko ovilikeya oratteene.

236 Vano, mwa yeela, Ettiminku enrwa, Apwiya yathuna, wuupuwela waka, nihaana, okela mowiixeryaxa ni mowiixeryaxa mwa isiiri iya suulupale sa Muluku. Ninrowa omukelela Melikhiseteki: Ole Owo aary'awe, vatthu Owo aakhumy'awe, otthu Owo aaronw'awe, etthu yaamukhumelenle Yoowo, ni sothene sa Melikhiseteki.

237 Nto vano, Namararu evinre ohiyu, Munna Neville aahikwannya ekapiitulu yoomaliherya ya oMuluku muulupale ni onamukuttho wa Pwiya'ahu Yesu, yoowo ompacerya wopaceryani, "Muluku, khalayi ni inamuna sinci-ene aahaalavuliha axitiithi ni moolumo a maprofeta, nihiku nla nookiserya oolavula ni hiyo mwa Mwan'Awé, Kristu Yesu."

238 Nto owo onootthikela, ni ompacerya ohimya ni okhalihha ettharihelo ya Ole Owo aary'awe, omuruuha Yoowo mpakha kapiitulu 5, wookiseryani w'ekapiitulu 5.

239 Vano opacerya ekapiitulu 6, nookhalana ela mwa nisomi nahu voosiis'ula.

Tivo-nto nihiyaka ithu soopacerya sa mwiixuttiho wa Kristu, nrowe nikeleleke ohoolo mpakha oloka voomalela; . . .

240 Akavi waasivenle mutthaka wa oloka voomalela? [Muthukumano oniira, “Amen.”—Mol.] “Nrowe nikeleleke ohoolo mpakha oloka voomalela.” Owo waari mutthak’ahu, voosiis’ula, mu kapiituluni 6 y’aHeperi.

241 Vano ninrowa okela paahi nipuro vaavo nimpacery’ahu okela e—epantte y’ekeekhai. Oh, hiyo othene ninoowerya wiiraana mwa itthu iya: mwaha wa oMuluku wa Kristu; ni Owo ory’ene Mwaana a Muluku; ni moota Owo aary’awe ni Muluku, ni Muluku aary’awe ni Yoowo; ni Owo aari mwa Muluku, ni Muluku mwa Yoowo, siiso. Hiyo othene nniiraana mwa yeeyo. Masi, vano, okhuma va nirowaka, nkisuwenle moota onrow’ahu wiiraana. Tivo etthu p’itthu, khula ohiyu vakhani, ninrowa woovahani okathi w’okilepela yoolepa ekhaani ni mukilelele enuupuwel’anyu wa Yeeyo.

242 Vano kinookhala oowaakhula sookoha. Ni kaahiwerye ophwanya, kinimwiira, “Munna Neville, munuupuwela sayi wa yeeyo?” Kinimwiira, “Owo vo. Mmuhiye aakhule.” [Munna Neville oniira, “Owo okathi onrow’aka osoma Ekereku.”—Mol.] Nto p’ukathi onrow’awe osoma eleexiku, onookumiha Ekereku. Kinooona wira p’ukathi wa miyo wira, nave.

243 Masi, vano, hiyo naiyeviha-ru ni khukhala a xariya, ni vekeekhai khurweela etthunelo emosa, okhanle, wiixutta. Ni, miyo kintthuna kiixutte. Nto Bibilia oolempwa, ohimnye wira, “Owo ti . . . Soolempwa khasihiyo sootaphuleliwa v’omeekha.” Eyo enihimya wira Yoolempwa ehaana otaphulela Yoolempwa. Munnona? Khula Yoolempwa ehaana otaphulela ekina, mBibiliani mothene, wira okhalihe etthu emosa yuulupale. Okhala wira, Muluku khokhanle orukunuwaka, okhala wira Owo ti Muluku ohinrukunuwa.

244 Vano, “Nihiyaka . . .”

Tivo-nto, nihiyaka itthu soopacerya sa mwiixuttiho wa Kristu, nikeleleke ohoolo mpakha oloka voomalela; . . .

245 Okisivela Paulo ahimya itthu iya. Paulo khonakhaleke mutthu waamusivela okhala okathi munci-ene nipuro nimosa. Owo waamusivela okela, moowiixeryaxa. Emaara emosa, mwa Yoolempwa, owo aahihimya, “Miyo, kiliyalaka itthu iye s’ottuli, kinnitthimakela omukaanoni wo wihaniwa wa wirimu.” Munnona? Owo ontthikela ailipihaka.

246 Va owo ohimnye wira:

Vano niliyalaka itthu soopacerya sa mwiixuttiho wa Kristu (Ole Owo aary’awe, etthu Owo aary’awe), nrowe nikeleleke ohoolo mpakha oloka voomalela; . . .

247 Vano hiyo, toko, naatthuna nisuwele, “Naamuwerya okhala ooloka voomalela?” Ni nihoona, mwa Soolempwa voosiis’ula, Matewu 5:28, wira Yesu oohimya wira hiyo “naahaana okhala

ooloka voomalela ntoko Muluku saary'awe," ahiiso khinaarowa ovolowa.

248 Vano nihoona wira hiyo naari, khula mmosa, "niyariwe mutampini, nipakiwe mwa sootakhala, nirwiiye molumwenkuni noothaka." Ni khiyaakhanle hat'etthu emosa yooreera wa hiyo, vano naarowa okhalakhala sayi niweryaka okhala oolokihiwa voomalela?

249 Vano va t'ile nimphwanyaahu nto, va, nisomaka, nikuxaka Yoolepwa ni Yoolepwa, wira, "Yesu, ni mukuttho mmosa, oolokihiwa voomalela, wa mahiku othene, Ekereja Awe." Owo... Hiyo nto n'oloka voomalela, mwaha wa Kristu. Ni nootaphuwa olamuliwa, mwaha wa Kristu. Hiyo khaninkhalakhala nikhwaaka, mwaha wa Kristu. Hiyo woonipweteya okhwa khuphwanya Ekumi, mwa Kristu; kahi mwaha wa ekereja, kahi mwaha wa muromolelo, kahi mwaha w'etthu y'ethiru, kahi mwaha w'olavula ilavulelo, kahi mwaha w'okhuwela, kahi mwaha w'ovahana matata, kahi mwaha wo wiina mwa Erooho, masi mwaha wa mahala.

250 Muluku onimwiihana ole Owo onimutthun'awe. Ni yothene mwaha w'othanliwa, hiyo ninnoona. Ninnoona, wira, "Kahi ole onthuna woopowa. Kahi ole onthuna wala ole onthyawa; ti Muluku onooniherya omoriwa ikharari." "Ni khaavo onwerya orwa wa Yesu ehikhanle wira Muluku onoomuruuha, toko." Vano nyuwo murina nnaata ni xeni ni yeeyo, khula enamuna? Khamurina nnaata ni hat'etthu. Nyuwo muri ota wa elatarato, voomalela.

251 Hiyo nihoona wira mutthu khonamphaveleke Muluku. Ti Muluku onimphavela mutthu. Ni nihoona wira, nto, wira Muluku ti ephattuvelo emosa paahi ya Ekumi Ehinimala. Nihoona wira itthu sothene sikhanel Soohimala khasirina epacerelo nnakhala emalelo. Tivo, ninnoona wira omooroni waahikhalana epacerelo, ni wookhalana emalelo. Ni eri paahi. . . Khaavo onwerya ohimya wira omooroni ti wa mahiku othene; wa mahiku othene, ayo, wa mahiku othene, masi kahi Woohimala.

252 *Mahiku othene*, ti "evirelo y'okathi." Bibilia onihimya wira, "Mahiku othene ni mahiku othene." Nto nyuwo mphavele mphwane vakhala wira *mahiku othene* khenihimya "evirelo y'okathi." Yona ohimye wira aari mmurimani mwa nankumi "mahiku othene." Ni Soolempwa sinci-ene sikina, *mahiku othene* enihimya paahi, "evirelo y'okathi."

253 Masi, *Ehinimala*, eyo ti wi "mahiku othene"; eyo ti wi mahiku othene ni mahiku othene ni mahiku othene ni mahiku othene ni mahiku othene. Eyo ti Ehinimala. Ni ninnoona wira omooroni kuhiyo Woohimala, masi ti wa mahiku othene. Ni mwaha aya, muhaana oweha moolumo awo, vano. Mwaahiwehe, munookhala oowiitepanya. Vano, muupuwele, itthu iye paahi

sahaarina epacerelo, khasirina emalelo. Tivo, Yesu ohimmy'awe, "Ole oniiwa Masu Aka ni onimwaamini Ole okirumme, ookhalana Ekumi," mahiku othene? Eyo enniweya oratteene? Nnari. "Ookhalana Ekumi Ehinimala." Ni nuulumo *Ehinimala* ti "Muluku." Nuulumo, va nri vaava va muleexikuni y'Ekereku: *Zoe* "Ekumi ya Muluku" mwa nyuwo. Nto nyuwo mwa Oohimala ntoko Muluku siry'awe Oohimala, okhala wira mookhalana Muluku mwa nyuwo.

²⁵⁴ Mukhalelo anyu wa khalayi ohookhwa, mukhalelo wa molumwenkuni, nto nyuwo munkhala yoopattuxiwa esya. Vano soothuna sanyu, makhalelo ale a khalayi yaarina epacerelo okathi Muluku iiseeleny'awe iphumu mphulani mwanyu, okathi oyariwaanyu, ekum'ile ya mukhalelo w'erutthu ehookhwa. Nto yaahikhalana epacerelo ni yaahikhalana emalelo, nto eyo ehookhwa ni yoomalamalihiwa wa mahiku othene, mukhalelo wa khalayi. Nto Muluku ookela ni Mukhalelo musya. Vano, ophenta, ohakalala, murettele, ovilela, othunku, murettele, ovilela, ni wiisumaaliha, ni oreera murima, eyo yookela; khukuxa opuro wa otakhala, oviruwa pure, ni onyokhana, ni—ni ehace, onyakulihana, ni itthu iyo sothene. Eyo yookhala opuro aya, okathi muvinry'anyu mookhwaani khuphwanya Ekumi. Munniiwa saana, oratteene, vano? [Muthukumano oniira, "Amen."—Mol.]

²⁵⁵ Vano, nwiriyane. Ori mukhalelo mmosa paahi wa Ekumi Ehinimala. Mphwanye Yoowo. Owo ti, Muluku paahi orina Ekumi Ehinimala. Bibilia ohimye siiso. Muluku paahi t'orina Ekumi Ehinimala. Nto vakhala wira mutthu onrowa ohaawa omooroni, mahiku othene, owo ohaana okhalana Muluku, Ohinimala. Masi kinihimya wira iwo . . .

²⁵⁶ Vano, muupuwele, nkinihimya wira khuuvo omooroni onipaha. Wookhala omooroni onipaha, mooro ni esoofiri. "Weiwo mu—munku okhanly'aya . . . mooro ohinttiphaaya ni munku ohinikhwaaya," wa mooro ni esoofiri, ehukhumu. Pooti omalaka miyaakha ipilyawu emiya. Masi ohaana okhalana emalelo, maana omooroni opattuxeriwe xetwani ni malaikha awe. Nto sothene iye Muluku, Mwaneene, yoowo aakhanle wopaceryani, sothene sikhumme wa Muluku. Okathi Erooho ene . . .

²⁵⁷ Nikuxe *Erooho* ya mphento paahi, eyo yaari ephattuwelo yuulupale ya Muluku, wooloka, woohihononiwa. Mwa yoowo, khurwa mphento *woohononiwa*. Vano khurwa mwa mphento *w'omutthu*. Vano khurwa mwa mphento *w'ekhapa*. Vano khurweela okhala miphentto mikina miphentto ni miphentto, nto khuthikela ohononeyaka mpakha ophiyerya okhala *otakhala* paahi. Masi itthu iyo sothene saahikhalana epacerelo. Nto nihiku nlo onoothikela oratteene wa ole woopacerya; ti Woohimala; weiwo ithaama, mphento w'omutthu, mphento w'osiveliwa, miphentto sothene iyo sirin'aya omalamala.

258 Wiipaka wothene nno wa Waamini ohaana omalamala. Iwe ori Waamini omosa w'ekeekhai. Sothene sikina sihaana omalamala. Iyo saari ihononelo sa ephattuvelo ela y'ekeekhai.

259 Vano, tivo, omooroni, ohaawa, ohaawa khuhiyo Woohimala. Ohaawa okhumelenle mwaha w'etampi, ni etampi khuruuha ohaawa. Nto okathi etampi emmalihwaaya, ohaawa ohaana omala, nave. Nto onookhala okathi mmosa yoowo anatampi, ahinatoko omukupali Kristu, emanle-ene ohukhummwa khino miyaakha ipilyawu emiya. . .nkisuwenle, khino miyaakha ipilyawu imilyawu emiya. Nkaawerya ohimya. Masi ohaana ophiya woomalelani, okathi uwo, okhala wira khuhiyo Woohimala.

260 Vano, ninrowa wiilipiha vano, nikelelaka oloka voomalela. Vano nwiriyane, nikelaka Mmutthakani.

*. . . nihihelaka-tho mulipiheryo wa orukunxa murima
wa miteko sookhwa, ni wo omwaamini Muluku,*

*Sa mwixuttiho w'opatiiso, . . . wiixaatherya
matata, . . . ohihimuwa w'alipa-ookhwa, ni . . .
olamuliwa ohinimala.*

261 Vano nwiriyane. Nookhalana piili. . . Nookhalana elatarato va, vano. Vano vaava va ti nipuro ninrow'ahu okhalana ohiiraana wuulupale. Vano muhaana woona vatthu eri elatarato ene. Paulo omphavela, va, ovalaaniha *ikano* ni *mahala*. Nookhalana ilatarato piili: emosa, y'erutthu; emosa, y'erooho. Nto Paulo omphavela o—ohapuxa piili iyo, wira owooniherye aYuta. Ewarakha ela ti y'aHeperi. Ni aHeperi othene amphavela wooniherya etharihelo ya Waataana wa Khalayi ekhalaka ethooneryo ya Wa Naanaano. Tivo, mookhalana ilatarato piili va so otthokelela.

262 Vano nwiriyane oratteene nisomaka. Vano owo ohimnye wira:

*. . . nihiyaka itthu soopacerya sa mwixuttiho wa
Kristu, nikelелеke ohoolo mpakha oloka voomalela; . . .*

263 Vano, naahikhalana eyo voosiis'ula, moota onkhal'ahu oolokihwa voomalela. Oolokihwa voomalela, woohikhala nlepa mara ni oohittheke, nnakhala etampi emosa mwa hiyo. Muri vasulu va ottehattehiwa? Nnakhala. Muniira etampi khula nihiku? Ayo, mulopwana. Masi, nnakhala vo, ninkhala oolokihwa voomalela okhala wira hiyo nri mwa Yoowo. Ni Muluku khaakhanle onilamulaka-tho nnakhala (khaarowa okhala naxariya), Owo oomala onilamula mwa Yoowo. Okathi omulamunly'awe Kristu, Owo ookilamula miyo, Owo ohoolamulani nyuwo. Nto Owo khokhanle okilamulaka-tho, okhala wira Owo ookuxa olamuliwa waka vakhala wira koovuluxiwa.

264 Ni wira kookhalana ettikitti yo wooniherya wira koovuluxa eroroco aka empa yo weemexerya, mutthu eererye ottikiherya empa yo weemexerya emaara emosa, kirina-ene ettikitti. Miy o koovuluxa.

Nto vaakhanle wira xetwani aarowa weererya ohela ehukhumu mwa miyo, kookhalana ettikitti enooniherya wira koovuluxiwa. Ayo, mulopwana. Khiivo-tho ehukhumu! “Ole oniiwa Masu Aka, ni onimwaamini Ole okirumme, ookhalana Ekumi Ehinimala, ni khonrowa olamuliwa, masi oovira mookhwaani khuphwanya Ekumi.” Eyo ti ettikitti aka. Owo ookivaha natiri.

265 Vano, vano elatarato, va.

. . . *nihihelaka-tho milipiheryo sa orukunxa murima sa miteko sookhwa, ni . . . omwaamini Muluku,*

. . . *mwixuttiho w’opatiiso, . . . wiixaatherya matata, . . . ohihimuwa w’alipa-ookhwa, . . . olamuliwa ohinimala.*

266 Vano, muupuwele. Mooweha nuulumo nlo orumeeliwa-tho? Noorumeela voosiis’ula, “Olamuliwa ohinimala.” Muluku vanlavul’awe vamosa, Ti Yoohimala. Eyo khenweryaneya orukunxiwa, hata vakhani. Tivo, olamuliwa ti Woohimala, kweekwe onkhala olamuliwa. Ni khivancala nloko xeeni ninkhal’ahu, nloko nimosa ninookhala, ni nlamulo nimosa ninookhala, nto ti na voohimala, wala khula okathi, ni *ola* ni *ole*. Masi olamula wa Muluku nlelo ti Woohimala, Owo ohaana, okhala wira Owo oolavula Masu. Muluku alavula-ru Masu, Awo ahaana okhala Oohimala. Ti yeeyo.

267 Vano mukihye koosomeleni yeeyo mw’Ekereku. Nwiriyanano moota ehimaly’aya.

Tivo-nto nihiyaka—nihiyaka itthu soopacerya sa miixuttiho sa Kristu, Ole ooreerihwa, naahaana okakha—okakhela mpakha e . . .

Vano, nkinwerya osoma. Eyo eroottipiheya. “Ni nihelaka-tho enamuna . . .” Ela va.

. . . *nihihelaka-tho enamuna ya orehererya wa miteko sinruuha okhwa.*

268 Vano, eleexiku ila khuhiyo hata otaphuleliwa mara, nnakhala. Nlo nuulumo n’Ekereku paahi na ele Enkelesi enihimiy’aya. Nto ehimmye wira, “Vano hiyo khaninthuna . . .” Nwiriyanano va, moone.

. . . *nihihelaka-tho milipiheryo sa orehererya wa miteko sinruuha okhwa.*

269 Vano mwavara-ru yeeyo mmuupuweloni mwanyu, ele owo onlavul’awe va, wira, “Inamuna sa orehererya sinruuha okhwa.” Paulo ohimmye wira, “Nihiyaka itthu soopacerya, nikelele oloka

voomalela, nihihelaka-tho mulipiheryo wa orukunxa murima sa miteko sookhwa sa omwaamini Muluku: miixuttiho s'opatiiso, wiixaatherya matata, ohihimuwa w'alipa-ookhwa, olamuliwa Ohinimala." "Inamuna s'orehererya sinruuha okhwa," yaari moolumo oolikana. Ti yeeyo vekeekhai Paulo olempy'awe. Munnoona emphavel'awe wira?

²⁷⁰ Vano, itthu iya sothene, ntoko opatiiso: mmosa ompatishiwa aroihiwaka ottuli, mmosa ohoolo, mmosa mwa nsina n'Atithi, Mwaana ni Erooho Yoowaarya, mmosa nsina na Yesu, mmosa enamuna *ela*, ni enamuna *ele*, ni itthu iya sothene sikhaani soovirikana sa opatiiso.

²⁷¹ Ni wiixaatherya matata: "Attotopeliwe Muluku, kihaana yoovaha yo wiixaatherya matata. Aleluya! Nyuwo, munoowerya waakhela Eyo enamuna *ela*. Aleluya!"

²⁷² Nihiyaka sothene iyo epantte aya, okhala wira iyo miteko sookhwa, irehereryo iya, sirehereryaka. Munnona? Owo onihimya sa muthinto mukina. Vano owo ohimmye wira, "Nrowe nikhume mwa seiyo, nto nikeleleke oloka voomalela." Munniiwa Yeeyo? [Muthukumano oniira, "Amen."—Mol.]

²⁷³ Nto ekereja nlelo enkhala epharelelaka itthu seiyo. Ti yeeyo awo yeerery'aya wira. Ekereja y'aHeperi yoopacerya yeererya ohimya wira, "Ahe, kipatishiwe kipwinihiwaka, ni—ni kihaakhela *ela*, ni *ela*, ni itthu *iya* sothene."

²⁷⁴ Owo khwira, "Vano, muhiye sothene iyo epantte aya, muhiyaka ottuli." Masi, vano, owo ohimmye wira khivaatthuneya hiyo wira? Vano nwiriyane ehimmy'awe wa yeeyo.

Nto ela hiyo nnimwiira, . . . Muluku atthuna.

²⁷⁵ Ni yoopacerya ehimmye etthu emosaru.

Ela hiyo nnimwiira Muluku anitthuniherya vale, moone.

Ela hiyo nnimwiira, Muluku anitthuniherya vale.

²⁷⁶ Opatiiiso, wiixaatherya matata, ni itthu, masi eyo kehiyo yooloka voomalela. Eyo erehereryo y'erutthu paahi. Nto ti vaavo ikereja simmalel'aya-vo, olelo, ti va erehereryo yeeyo y'erutthu. Mmosa aya iirale, "Oh, ahe, maasi, nuulumo *opatiiso* nnihimya *ela* ni nnihimya *ele*."

²⁷⁷ Vano awo khupaka mitthenkeso: nto mmosa onoomiserya, mukina aya onootathela, mukina ompatisha owehahaka ohoolo, mukina aroihiwaka ottuli, ni itthu iya sothene; akina aya ewiixaatheryaka matata aretta, ni akina yaakhalihaka arummwa, ni akina yaakhalihaka maprofa ni sikina, ewiixaatheryaka matata; ni elaleyaka ohihimuwa w'alipa-ookhwa, nto yeeyo ekhanle yothene yoolikana; ni oMuluku muulupale wa Kristu, eyo ti yoolikana. "Masi," owo ohimmye wira, "sothene iya irehereryo sookhaleleya. Hiyo ninkhala

nirehereryaka paahi. Vano nrowe nikelele ohoolo mpakha oloka voomalela.” Munniphwanya elatarato ene? [Muthukumano oniira, “Amen.”—Mol.]

278 Vano nwehe. Va ti nipuro epantte yoowiixerya enrwaaya vano.

Tthiri khinweryaneya w'ale yaatonko omwaleeliwa, ni yaalawinhe yoovaha ya wirimu, ni yiirale mpantte wa Erooho Yoowaarya,

Ni yaalawinhe masu ooreera a Muluku, . . . oweriya wa olumwenku onrwa,

Awo yamora vale, ohokolowela-tho orukunxa murima; woonaka wira wa yaawo annimukhomela-tho Mwaana a Muluku, emuulihihaka muru ohoolo w'atthu.

279 Vano, koosuwela etthu nyuwo anamatthariha ikano murin'anyu mmuruni mwanyu naanaano va, masi moovonya. Munnona? Vaareera. Miyo kinkhala mwa yeela, ni Bibilia onnilipiherya, wira, “Vakhala-ru wira Muluku oomopola mutthu, owo t'owoopowa wa okathi ni Ehimalelo.” Khamukhanle omwiirihaka Owo ohimya etthu ekina.

280 Nasoophaveleya mmosa aahikirweela, woohikhala khalayi, nto khwira, “Kihoophwanyani mwa emosa, Mulaleyi Branham. Kihoophwanyani. Nyuwo muhimmye wira, ‘Mutthu oopowa-ru, khivaaweryaneya owo opweteya?’”

281 Miyo khwira, “Eyo t'ile Muluku ohimmy'awe.”

282 Owo khwira, “Kintthuna kookoheni etthu emosa. Sawuli aari profeta, ni aahilaleerya. Ni nyuwo moosuwela wira owo aari ootitikitheliwa a Muluku. Bibilia ohimmye wira owo aari yoowo. Vano owo aarimwiisiiva, nto khupweteya.”

283 Miyo khwira, “Owo aahipweteya?” Miyo khwira, “Bibilia onihimya wira owo 'ohoopowa.' Numala okhala nwanani a Muluku, owo nlelo ohoopowa. Bibilia ohimmye wira ohoopowa. Ni, numala sothene, owo khaaisiivale. muFilisti mmosa aaroomwiiva, nto Davidi khumwiiva muFilisti mwaha wo omwiiva owo. Owo ammorenle xoowa awe, nivaka nawe, xoowa, masi, owo aahiira. Owo khaamwiivale. Vano muFilisti khumwiiva. Vano nto Sawuli varonw'awe wa mukhwiri, nto owo khwiihana erooho ya Samuweli, okhala wira owo khaavolonwe Movuwani, owo aari oparatiiso vathi va ephome yoomwaraxiwa y'amwaanyompe ni ipuri yeeyo yahaawerya okumiha etampi. Masi owo aahaana okhalana nipuro n'olipelela, nnihaniwa eparatiiso, mpakha owo okela.”

284 Ti vaavo nyuwo aKatolika mukhanly'anyu ootapanyeya. Munnona? Vano, khiivo-tho eparatiiso vano. Hiyo ninrowa voulukama Ohoolo wa Muluku.

285 Nto okathi mukhwiri a wEndori iihannyawe erooho ya Samuweli, owo aahivenya. Vano khumora aipopheyaka, nto owo khwira, “Mukootothenle-ni nyuwo?”

286 Ni khaari Sawuli paahi eemenle vale. . . kiireke Samuweli, mukuwoni mw’awe s’eprofeta, owo nlelo aari profeta. Owo khwira, “Mukiihanenle-ni waamumul’aka-wo,” khwira, “woonaka wira mookhala nwanani a Muluku?”

287 Owo khwira, “Ahe, Urimi khonlavula-tho ni miyo. Profeta khonwerya okilaleerya-tho. Hata nkinkhalana yooloha.”

288 “Ahe,” Samuweli khwira, “mookhala nwanani a Muluku. Masi meelo ekhotto enrowa epantte ekina, nto nyuwo munimookhwa meelo. Nto okathi yoola, meelo ohiyu, nyuwo munookhala ni miyo.” Vakhala wira Sawuli oopweteya, weso Samuweli ti siiso, awo yaari oowaili vamosa. Vekeekhai. Bibilia ohimnye siiso.

289 Vano, nyuwo pooti okhala othene oovihererya mwa otannyeya, mwaha w’olavula ilavulelo, okhuwela, ohakhinyeya, othukumela, otthimaka nno ni nno munvireloni. Hat’etthu yoovirikanya eyo. Masi pooti wiisaaminiha wira muhoopowa muhikhanle, muhikhanle owoopowa. Makhalelo anyu animooniherya ele mukhanly’anyu. Yesu oohimya wira yaamooniherya, “Ni mihokorokho saya munimwaasuwela.” Makhalelo anyu animooniherya khama muhoopowa wala nnari, vakhala wira khamunatoko nnakhala otthukula eyano anyu. Animooniherya ele mukhunly’anyu.

290 Masi ovihererya nno wothene ni otannyeya ni wiitakaniha ekereja, “Ni koopatisiwa mwa Nsina na Yesu, aleluya, koosuwela wira kihaana Eyo,” eyo khenihimya hat’etthu.

291 “Koopatisiwa, nsina n’Atithi, Mwaana, Erooho Yoowaarya, oroiheliwa ohoolo, vaara vararu. Kihaana Eyo.” Eyo khenihimya hat’etthu.

292 Paulo ohimnye wira, “Nikeleleke ohoolo mpakha oloka voomalela vano.” Ninlavula mwaha w’olokihiwa voomalela. Nto hiyo nawehaweha saana yeela, munoophwanya wira, ole oolokihiwa voomalela t’ule Oothanliwa. Kinoowooniheryani nyuwo, muhina mwa minuutu vakhani, ni Bibilia. T’ale Oothanliwa yaawo Muluku, ohinathi opattuxiwa olumwenku, aawoonaly’awe khula mmosa a yaawo. Vano Owo khunveleeliha Yesu wira aavuluxe atthu awo, kahi olumwenku wothene. Owo aanitthuna, masi Owo aahaana waapakela ephiro ale. Nto enamuna emosa Owo aakhanly’awe wiiraka, waari onveleeliha Kristu; wira Owo arwe, mukuttho w’ottipiha itampi sahu, wira ale athanliwe, Owo awerye waaruuha wa Yoowo, mwa Ovuwa.

293 Mwaamuwerya omutthokelela Muluku weettiherya muteko Awe voochikasopa, ntoko wira, “Ahe, khino onookhala mutthu onrowa oxanka vanci-ene mwaha wa Miyo, khino awo animoorwa nto yoopowe”? Muluku khorina w’olapelani

nyuwo wira etthu. Khula olapela, ti nyuwo murina olapela, kahi Muluku.

²⁹⁴ Vano nto, Kristu okhwenle wira owoopole ale Muluku, mwaha w'osuwela khalayi ene, aathanlaly'awe wira ekumane ni Yoowo iwe oohikhalana nlepa wala ninnyaari. Ohinatthi opattuxiwa olumwenku, Owo aahiwoonani Movuwani. Eyo t'ile Bibilia ehimaly'awe, aEfeso, kapiitulu 1. Kapiitulu 5, versiikulu 1. Muluku aahitthomela mwaha w'osuwela khalayi ene.

²⁹⁵ Vano, vakhala wira Muluku ohiira yeeyo, oonitthoma hiyo ohinatthi opattuxiwa olumwenku, ni khimusuwela khula mmosa a hiyo ni nsina, ohinatthi opattuxiwa olumwenku, ni wira oonithanlela Ekumi Ehinimala, vano khunveleeliha Yesu Kristu wira anivuluxe, wira, miyaakha ikonto thanu na mosa khalayi, Owo aahinoona hiyo, wira niwerye okhumelela wa mittotopelo Sawe mwa Ovuwa, munwerya sayi okhalakhala mpweteyaka?

²⁹⁶ Vano, nyuwo moopowa vale, muhoopowa. Vakhala wira Muluku onoowoopolani ohiy'ula, asuwelaka wira Owo onoorowa orimeeliwa nyuwo miyaakha miloko okhuma olelo, Owo onwanana etthunelo Awe Yoowo; Muluku, oohimala, Oowerya sothene, Ohinimala, a osuwela vahinimala, khonsuwela voophiyerya nto wira asuwele khama munoovarelela wala khama khamunrowa. Vano, okathi Owo oniwoopol'aweni, ni wira, "Ahe, kinonvaha wehereriwa, koone etthu onrow'awe wira," weso Owo khonsuwela emalelo okhuma wopaceryani. Muluku onnisuwela etthu Owo oniir'awe, muhivela-vele mwaha wa yeeyo. Ti nyuwo ni miyo nniikwattula mphironi. Muluku onnisuwela etthu Owo oniir'awe. Ni Owo aanisuwela wira hiyo. . . khama naamuvarelela, wala etthu naarow'ahu wira.

²⁹⁷ Vano, Bibilia ohimnye wira, Esawu ni Yakope, ehinatthi hata mwaana mmosa oyariwa, Muluku iirale, "Miyo kinimpheenta mmosa, ni kinnimunyokha mukina," awo ehinatthi hata omumula ephumu aya yoopacerya, wira othanla Wawe okhale woomaliheriwa.

²⁹⁸ T'ani aari Abrahamu (Ninoomuphiyerya yoowo muhina mwa minuutu vakhani, va.), owo aari aani, Muluku vaarin'awe omwiihanaka, ohikhanle ole oohikhalana etthu? Muluku ompaka waataana ni mutthu, mutthu onoohonona waataana wawe. Masi Muluku aahipaka Waataana ni Yoowo mwaneene, ni khulaphela yeeyo, ni yoowo Mwaneene, mutthu khorina nnaata ni yeeyo. Iwo osuwela wa khalayi wa Muluku Mwaneene, Owo aahiira, khula enamuna.

²⁹⁹ Vano, nyuwo muniira, "Ahe, Munna Branham, nto kakhala muKristu, pooti wira etthu p'itthu paahi entthun'aka wira?" Voomalela. Mwakhala muKristu, mwiireke etthu p'itthu muntthun'anyu wira. Ni kinimoolipiheryani, wira khamunrowa okhalana hata otthuna wo wira yoonanara. Munimwiira etthu p'itthu. Miyo kweekwe kaaniira etthu kaatthun'aka wira. Nto

vakhala wira kinaarumeela Apwiya mwaha wo wira kinoova orowa omooroni, nkinaarumeela Awo oratta-ene. Vakhala wira kinkhala oororomeleya n'amwaar'aka mwaha wo wira kinnoova awo okimwalana, nkihiyo iya ooloka saana. Masi nkaarowa waananariha ni hat'etthu, okhala wira kinnaaphenta.

³⁰⁰ Eyo ti moota ery'aya ni Kristu, okathi mutthu oniyariwaawe ni Erooho ya Muluku. Kahi mwaha wo wira ookhuwela, oolavula ilavulelo, wala eyuukhuwelo; masi mmurimani mwawe, ophenta orookela khukuxa opuro wa olumwenku. Kinimooleelani, owo onnimphenta Owo. Owo oneetta vakhiviru wa Yoowo, khula nihiku. Khamurina omuleela, "Ti yoonanara wira *ela*, wala *ele*, wala *ekina*." Owo onnisuwela wira ti yoonanara. Ni, owo oneetta, owo muhokorokho wooreheriwa wa mahala oomeekha a Muluku. Vekeekhai.

Tthiri khinweryaneya w'ale yaawo yaatonko omwaleeliwa, . . . yirale mpantte wa e . . . wiihana wa wirimu . . .

Vano, imaara sikina ninaaminiki wira owo aari mutthu aatonko omwaleeliwa khutthikela omora, masi Bibilia khonsommwa siiso. "Ti voohiweryaneya mara wa mutthu," owo onihimya va, "aakhenle Erooho Yoowaarya, okhalakhala amoraka." Vano musome musuwele eyo yahaakhanle oratteene. Nwehe va, mukuxe yoosoma, yoosoma yothene, ni sookhala-mo, yoohimya, kiireke.

³⁰¹ Vano owo ompacerya olavula mwaha wa, exeeni iyo? "Nrowe nikelele ohoolo mpakha oloka voomalela." Vano, owo ohimmye wira, "Kahi v'erutthu, ohela mulipiheryo va wa miixuttiho ni opatiiso ni irehereryo, ni sikina. Nihiiireke yeeyo. Nrowe nikelele ohoolo mpakha oloka voomalela." Mwaha ene ti *oloka voomalela*, ni oloka voomalela onrwa ni Kristu. Nto hiyo ninkela sayi mwa Kristu? Mwaha wo wiitakaniha ni ekereja? "Mwa Erooho emosaru hiyo othene noopatisiwa mw'Erutthu emosaru." Kahi ni: mmosa, olavunla ilavulelo khukela; mmosa, ovahanne matata khukela; mmosa opatisiwe ni maasi khukela. "Masi mwa Erooho emosaru hiyo noopatisiwa mw'Erutthu emosaru." Munniiwa oratteene? Iwo p'uloka voomalela.

³⁰² Nto nyuwo mwakela mwa Yeeyo, muri mwa Kristu, nto olumwenku ohookhwa wa nyuwo. Ni muneetta ni Mwaapwittipwitthi khula nihiku, ni mavalu anyu aneettihieriwa ni Muluku, etthu yo wira. Oh, mukhottoni ni wehereriwa onivir'ahu-mo! Nyuwo muniira, "Mookhalana wehereriwa?" Ayo, mulopwana. Exeeni e . . .

³⁰³ Mahala ti etthu Muluku okiireny'awe, miteko ti etthu kininvar'aka Muluku. Vano, awo anookhaliha mwiixuttiho okhuma wa yeeyo, awo anuupuwela wira miteko ti simphwanyihya iphwanelelo sanyu. Vakhala siiso, kehiyo yoovaha ya mahala. Mahala ti etthu Muluku owiireny'aweni, "Ni mahala

muhoopoliwa.” Nto miteko t’iye munvar’anyu mwa oxukhurela mahala Owo owooniheny’aweni. Nto mwamphentaka Owo, enimoosivelani ovara miteko s’Apwiya. Vekeekhai, okhala wira, nto, nyuwo—nyuwo munimwaaphenta Yaawo.

³⁰⁴ Omukupali Meda Broy, okhala mwaar’aka, t’ile ophenta omwiireny’awe. Ele eniir’awe, mwa oxukhurela: owo muthiyana ooreerela, onnikhala owaani, onnaakhapelela anamwane, ni onkhala makhalelo ooreera ni eekeekhai. Eyo kahi mwaha wo wira khanithelanne; hiyo noothelana. Masi owo oniira eyo mwa oxukhurela. Vaakhanle wira owo aarowa opooma, khula nihiku, ni ovolowa mulooa mwa isentavo muloko, ni weettasa mphironi, ni ohirapiha mihasa, wala etthu p’itthu ekina, nlelo hiyo noothelana. Vekeekhai. Okathi ommann’aka natiri aka, owo onnimaliha mwaha. Owo ti mwaar’aka. Vakhalaru wira yookhala ekumi mwa hiyo, owo ti mwaar’aka. Owo ti natiri awe. Masi oxukhurela xeeni owo oniir’awe mwaha wa yeeyo: owo onkhala owaani, ni onaakhapelela anamwane, ni ophavela okhala mwaara eekeekhai.

³⁰⁵ Kaamuwerya okhuma ni ohikhala-wo okathi wothene, keettasaka mulaponi mothene, ni omuhiya owo avoliwaka etala, wala etthu p’itthu, waahiya anamwane ehirina etthu y’olya; hiyo nlelo n’othelana. Owo hata akimwalana vale, nlelo k’othela, vakhalaru wira yookhala ekumi mw’erutthuni mwaka. Miyo kommana natiri ule, “Mpakha okhwa onivalaanihe.” Ti yeeyo. Hiyo nlelo n’othelana. Masi, kinamwi, kikhalaka iya oohiloka. Owo akhalaka mwaara oohiloka. Vano naaphentanaka mmosa ni mukhw’awe, ninookhala vamosa n’upurula muritti, vamosa.

³⁰⁶ Ti siiso siry’aya Muluku ni Ekereja Awe. Okathi muniyariw’anyu Momweneni mwa Muluku, munookhalana sa *vasulu* ni *vathi* sanyu, ekeekhai, masi nlelo mwa muKristu, nlelo mwa ooyariwa ni Erooho ya Muluku. Muluku pooti okhalaka oowookumihani mulaponi vooihilekela.

...eyo *khinweryaneya w’ale yaawo yaatonko omwaleeliwa, ni yaalawinhe . . . yoovaha ya wirimu, . . .*

...yakhalakhala *emoraka, ohokolowela-tho wa yaawo orukunxa murima; . . .*

³⁰⁷ Vano, koosuwela vatthu vanuupuwel’anyu, ekereja. Mukihiye kooroiheni w’ekina y’olipeka vakhani, wira e—epantte y’otthariha ikano ewerye okhala vekeekhai yoomaalihiwa. Nrowe nirowe mw’aHeperi, kapiitulu 10, nto niwehe yeela okathi vakhani paahi.

³⁰⁸ Kapiitulu 10, versiikulu 26.

Okhala wira nairaka etampi voothuna nuumala . . . hiyo naakhanle-ene osuwela w’eekeekhai, khuwo-tho mukuttho mukina wa itampi,

Masi olipelela olamuliwa . . . wo woopiha ni mooro onvarela, onrowa ompwetexa nwanani.

Mutthu aahonona ikano sa Moise aaniiviwa ahimoreliwaka ikharari mwaha w'anamoona aili wala araru:

Yootepa waatta ehukhumu yuulupale, munuupuwela wira . . . wira omphwanela, . . . omunyakenle . . . ole omunyakenle vathi va nnawu Mwaana a Muluku, ni okhalihale ephome yo waataana, yeeyo owo oreerihaniwaawe, ntoko etthu yoonanara, ni . . . oruwanne miteko sa mahala?

³⁰⁹ Vano nyuwo muniira, "Ankhi yeeyo, Munna Branham? Eyo enooneya sayi?"

Vano, osoma paahi, kinoona wira, "Yoolempwa khenihimya yeeyo." Eyo khenimuhimya muKristu. Eyo enimuhimya mutthu oiwale Masu nto khukhootta Yaawo. Munnona?

Maana hiyo naira etampi . . . (Etampi exeeni? Ohaamini.) . . . hiyo naahaamini-ru vootthuna nimanlene olaleeriwa ehapari yooreera, khuwo-tho mukuttho mukina wa itampi,

³¹⁰ Etampi exeenii? Ohaamini. Mmusome Yohani Oowaarya, kapiitulu 4. Yesu ohimmye wira, "Ole ohinaamini oomala ohukhumuwa." Etampi kuhiyo onvura sikaro, owurya, oraruwa. Nyuwo muniira iyo okhala wira mwa mulipa-ooahaamini. Iyo ti mikhalelo paahi. Muniira eyo okhala wira mwa mulipa-ooahaamini. Ohiya onvura sikaro paahi, ohiya owurya, ni sikina siiso, khenihimya wira mwa—mwa muKristu. Iyo ti mikhalelo paahi sa orukunxa wanyu murima. Masi, nyuwo pooti—nyuwo pooti wira ipantte soopiili, nave nlelo khuhikhala.

³¹¹ Vano nwehe.

. . . ole ohinaamini vootthuna numala owo . . .

³¹² Kahi—kahi, "Numala owo omwaakhela Kristu mmurimani mwawe." Bibilia khonihimya yeeyo. Ohimmye wira, "Ole o . . ."

. . . nairaka etampi vootthuna, ohaamini vootthuna, numala . . . hiyo waakhela osuwela wa ekeekhai, . . .

Munniwa? Khaalavula ni muKristu, hata vakhani.

³¹³ Muthiyana mmosa aahikirweela, woohikhala khalayi, nto khwira, "Munna Branham, miyo ka muKristu, masi kooveeha Erooho Yoowaarya."

³¹⁴ Miyo khwira, "Ti yoohiweryaneya." muKristu khaakhanle oveehaka Erooho Yoowaarya. Khamukhanle wira. Erooho y'oKristu enkhalala onamoona Erooho ya Kristu. Munnona? Nto nyuwo munimwiilhana, ithu sothene sa Muluku, "sa Muluku."

³¹⁵ Masi mwakhala a muupuwelo w'erutthu, munoonyemula ni otheya Erooho Yoowaarya; Nkincala moota xeeni munrowaanyu

okereja, nlelo mwa natampi, ni muniveeha Erooho Yoowaarya. Awo vaamoonaly'aya Yesu alamulaka soowuupuwela saya, awo yiirale wira Owo aari "nahako."

316 Yesu khwira, "Nyuwo . . . Miyo kinimoolelevelani mwaha wa yeeyo, masi Erooho Yoowaarya yarwa vale, olavula nuulumo nimoso nveehaka Yeeyo, khamunkhalakhala nleveleliwaka."

Okhala wira, awo yiirale, "Ole orina erooho yootakhala," yiihanaka Erooho ya Muluku, "ethu yootakhala."

muKristu khokhanle wira eyo. muKristu okhati wothene onimwiihana Erooho ya Muluku, "Exariya." Munnona? muKristu khokhanle oveehaka Erooho Yoowaarya. T'ule oota oniveeha.

317 Ale khiyaari aKristu yeemenle vale. Awo yaari athu anatiini, yaari aYuta ortotoksa, matothori a divindad, ni sikina, nto awo yaamunyemula Owo ni miteko Sawe, yiihanaka miteko sa Muluku, wira, "Yaari erooho yootakhala yaavara."

318 Nto akavi munuupuwel'anyu olelo anveeha Erooho Yoowaarya, arina D.D.D., Ph.D. vansinani vaya? Aalupale akavi, Ortotoksa oolipa murima, aKatolika, aPrustante, aneetta mphironi ni onyemula muteko wa Erooho Yoowaarya, asomi ooratta, ni oothererya ntoko epitawu? Khweeli. Masi awo anninyemula Erooho Yoowaarya, ni tivo anniveeha Yeeyo.

Masi muKristu ooyariwa vasya khokhanle wiiraka eyo. Owo onimwiira, "Ole ti munn'aka. Ele Erooho ya Muluku mukumi." Ti yeeyo. muKristu khokhanle oveehaka Erooho Yoowaarya.

319 Ti natampi oniveeha Erooho Yoowaarya; mulipa-oohaamini, *natampi*, "mulipa-oohaamini." Siri ithu piili paahi: nyuwo munkhala mulipa-oowaamini, ahiiso mulipa-oohaamini.

320 Vano, nwehe va, wira ekhale yootthukwana saana vano. Kaahikhalana yoowoona yaakihaaxaka okathi wothene. Miyaakha sivinre kaaniwehaka yeeyo. Miyo kiiraka, "Oh, mutthu aphiyererya waakhela Erooho Yoowaarya nto, vano nto khutthikela ottuli, owo aamupweteya voohimala." Nkaawerya ophwanya ela ekina wira ekhalane maana ni yeeyo.

321 Miyo khwira, "Vano xeeni Bibilia akelaka ohimya, wira, 'Ole oniwa Masu Aka ni onimwaamini Ole okirumme ookhalana Ekumi Ehinimala, Ehinimala, ni khankhalakhala alamuliwaka, masi oovira mookhwaani khuphwanya Ekumi. Othene ale Atithi akivahaly'aya animoorwa wa Miyo, ni khaavo mmosa a awo onipweteya, Miyo kinimwaahihimuxa mahiku ookiserya. Khaavo onwerya waakumiha mmatatani Mwaka?' Moota xeeni eyo enkawanyey'aya n'ila? Nkaawerya osuwela saana tu. 'Ti yoohiweryaneya w'ale yaatonko omwaleeliwa.'" Miyo khuupuwela, "Yookhala ethu evonyeieye. Nkinwerya osuwela tu."

Nto kaahirowa muthukumano mmosa w'aPentekosite, miyaakha sivinre.

³²² Khaavo hata mmosa ohanle mukereja, woona waka, ohiy'ula, onuupuwela. Miyaakha sivinre, ola waari paahi ntoko okathi etapernakulu etekiwaaya. Woohikhala, wira aari Munna Graham ottuli iwe, wala mutthu. Nkisuwenle, khama nyuwo mwaari vaava toko, wala nnari, axinna. Munna Mahoney, kinoona wira, aahikhala. Ayo. Okathi vakhani kihinatthi othela.

³²³ Yoovaha ele evaraka muteko, miyo kaahoova. Awo yaakileela wira yaari ya xetwani. Miyo nkaasuwela mpakha Nlaikha n'Apwiya okileela.

³²⁴ Miyo kaaronwe oMishawaka, nto khukilaathi vamuthukumanoni vale, ni nkaatonko wiiwa okhuwela vanciene ni wunla ni omuttotopela Muluku. Miyo khuupuwela, "Munna, ela Erimu." Nto, oh, moota awo yaarowas'aya nno ni nno.

³²⁵ Awo yaahaana okhalana Onkela ephoyo, mwaha wo ovalaana. Alipa-ooripa ni akunya yaari vamosa. P.A. ya W. ni P.A. ya J.C. yaahitakanxana khukhala Pentekosite Oowiiraana. Masi muhakalaliho xeeni awo yaakhalan'aya, otapernakulu wa Munna Rowe iwe oMishawaka. Nto miyo, mutthu ootthuna osuwela mwaamukhaani, kikilante-ene ekhukulu y'ottuli, kaamuweha yothene ela. Kiira kihinatoko woona itthu iya khalayi.

³²⁶ Aahikhala mulopwana mmosa aakilante va...Miyo nkinatoko othariha ela v'atthuni khalayi. Aahikhala mulopwana mmosa aakilante epantte emosa, ni mulopwana mmosa ekina, nto mmosa aalavula ilavulelo, ni mukina aamutaphulela. Vano awo yaanihimyasa itthu soohiyana-hiyana saarowa okhumelela. Vano, *ola* mmosa aalavula ilavulelo, ni *ole* aamutaphulela. Miyo khuupuwela, "Wulu, kahi yooreerexa!" Miyo khuupuwela, "Ovuwa xeeni! Ale ahaana okhala Malaikha, akhurunwe ntoko atthu."

³²⁷ Ahe, miyo kaarina etoolare emosa ni isentavo miloko mithanu na miili ni thanu, wira kirowane owaani, ni miyo—miyo—miyo kaawerya paahi othuma etanki emosa ya kasoliina. Kaarumpe mmatta mwa nakhuwo ohiy'ule. Kookhalana epantte ya yeeyo muliivuruni, masi kahi yothene, okhala wira nkaatthuna waananariha moonelo aya. Nto siiso, ohiyu yoowo, awo yiirale, "Alaleyi othene erwe vaplataforma." Miyo kaari vaplataforma. Kaari mulaleyi ootepaxa oyeve vale okathi ule.

³²⁸ Vano, voosiisu woottharelana, awo khukivekela wira kirwe kilaleye. Miyo khwiipitha. Moosuwela, mulopwana ooriipa khwira, "Ola ori va." Nyuwo munnimuupuwela wahala aya, okathi owo aakoonelihaly'awe kikilaanthe weiwo.

³²⁹ Vano nto numala olaleya nihiku nle, keettakasaka, miyo khuupuwela, "Vaakhanle wira kaahiwerya paahi waaphwanya

axilopwan'ale aili." Awo yaahoolela muthukumano. Mmosa aamuvenya n'ukhala ootteela wiitho; aamulavula elavulelo. Nto mukina aamutaphulela, ni ohimya moolumo ene, "SIISO ANIHIMYA T'APWIYA, 'Ookhala mutthu *khata-khata* va, a nsina *khata-khata*, aahaana wira ela ni *khata-khata*." Munna, yaari ekeekhahi. Nto ole mukina aamuvenya n'ulavula ilavulelo, nto owo aanitaphulela.

³³⁰ Miyo khuupuwela, "Oh, wulu, ela kehiyo yoothamaleya!" Vano, nihiku nenlo, miyo khuupuwela, khukhuma khuvekela. Miyo khuupuwela, "Pwiya, Nyuwo mukiirele yeele-tho miyo." Nkaasuwela moota wo wihana, soowoona.

³³¹ Miyo khukhuma khuvekela, ni khwaavekela Apwiya wira ekikhaliherye. Khurowa kirukureryaka empa, nto khwiiraneya okumana ni mmosa aya. Vano, Apwiya aakivaha enamuna yo osuwela itthu. Miyo khuttikinya ntata nawe. Miyo khwira, "Ehaali anyu?"

Owo khwira, "Ehaali anyu? Nsina nanyu ti pani?"

Nto miyo khwira, "Branham."

"Oh," owo khwira, "nyuwo mwa mmirav'ole olaleiye voosiis'ula."

Miyo khwira, "Ayo, mulopwana."

³³² Kivaanelaka ni yoowo, kaahivara erooho awe. Nto owo aari muKristu oolikana, muKristu ooloka paahi, munna. Kinihimya, owo aari mulipa-oowaamini. Miyo khuupuwela, "Oh, ela kehiyo yoothamaleya!"

³³³ Nto voophiyaka ntoko ewoora emosa ohoolo waya, ota nno vakhiviru n'ekaaro, vaavo kaaweh'aka vakaaroni yuulupale, yaarina "Yesu Paahi" yaalempwe ottuli waya, nto eemenle-ene vate vale aaphwanyaneya mulopwana mukina. Nto miyo khukhuma miyo khwira, "Ehaali anyu, mulopwana?"

³³⁴ Owo khwira, "Ehaali anyu?" Khwira, "Nyuwo mwa Munna Branham, olavunle voosiis'ula."

³³⁵ Miyo khwira, "Ayo, mulopwana. Ti yoomi." Miyo khwira, "Mwiiwe, okisivela yoovaha yuulupale ya Muluku envara muteko mwa nyuwo axinna aili."

³³⁶ Owo khwira, "Kooxukhuru, Mwenye Branham." Nto khupacerya woona erooho awe. Yoowoona khurwa. Nto vakhala wira kootoko olavula ni namirima miili, vale aari mmosa aya. Amwaar'awe yaari muthiyana a maihi ooriipa. Owo aakhala ni muthiyana a maihi ootteela, aahikhalana aana aili ni yoowo. Owo khaari-tho muKristu ovikana hat'etthu molumwenkuni.

³³⁷ Vano miyo khwira, "Exeeni kiikelinh'aka-mo? Miyo koona wira kaari eriyari ya Malaikha, nto vano kihaana wira kikhanle-ene eriyari y'axetwani. Yookhala etthu ekhumelenle. Va aari mmosa, muKristu oolikana; nto Erooho emosaru yammorela

mulopwan'ola, yaanimorela mulopwan'ola." Miyo khwira, "Vano kiri othene ootikinihiwa." Nkaasuwela etthu yo wira. Miyo khwaavekela ni khwaarokela, Apwiya. Nkaasuwela etthu y'okupali.

³³⁸ Awo yaahala okiiriha miyo o...Khukikoha khama kaahaakhela Erooho Yoowaarya, mulopwan'ola khukikoha, nto miyo khwira, "Nnari, mulopwana, kahi mwa enamuna nyuwo murin'anyu Yeeyo."

Khwira, "Mootoko olavula ilavulelo?"

Miyo khwira, "Nnari, mulopwana."

Khwira, "Weso khamurina Yeeyo."

³³⁹ Vano miyo khwira, "Alakela mookhalana exariya, munn'aka. Khino nkirina, okhala wira nkirina ele murinas'anyu." Nto nuvira okathi vakhani, kaahoona saana ohikhalana.

³⁴⁰ Vano nto kaahiweha yeeyo, ni kaahoona enamuna eyo yeett'aya.

³⁴¹ Vano, nihiku nimosa, kaari nno kivekelaka, khalayi. Kinimooleelani mwaha aya, mutthu kaamuvekelel'aka, aari Roy Davis. Nto kaari nno kivekelaka, okhala wira owo aarookiihana "mwaattepa," nto kanvekela Muluku wira amulevelele mwaha wa yeeyo. Ni owo aahikhalana maakina ootthitta iwe, khulepa exornaale. Vano maakina awo ootthitta khupaheya khuvya, mahiku maili numala yeeyo, okathi awo yaavar'aya muteko.

³⁴² Nto siiso miyo keemenle ottuli iwe mmuttuphani wa khalayi ottuli w'Onxiloni w'oGreen. Miyo khweetta kirowaka weiwe. Nto kaamuvekela, kaahikhala weiwe, mahiku maili. Miyo khumpweha Bibilia aka vasulu va nntoro na khalayi, vaavo, kaamoonihaly'aka Munna Wood, woohikhala khalayi, khumpweha Bibilia aka vathi. Miyo khukilaathi kiwenle-ene nntoro. Vano ettheke khuruma. Miyo khuupuwela, "Kookhala okathi munci-ene, mmuttuphani mme, kinoosoma vakhani paahi." Vano miyo khimukuxa Bibilia khupacerya osoma, nto ela yaari ekapiitulu yaary'aya-vo. Ahe, miyo khupacerya osoma, nto khupacerya otikinihiwa okathi uwo. Munnona?

*Tthiri eyo khinweryaneya w'ale yaatonko
omwaleeliwa, . . .yiirale mpantte wa Erooho
Yoowaarya,*

*. . .yaalawinhe masu ooreera a Muluku, ni . . .
olumwenku onrwa,*

*Awo yamora, ohokolowela-tho wa yaawo . . .
orukunxa murima; okhala wira awo annimukhuomela-
tho wa yaawo Mwaana a Muluku, emuulihihaka muru
v'atthuni.*

343 Miyo khuupuwela, “Vale eri Yolempwa ele.” Masi etthu yaahihala ni miyo. Vano kipacerya wuupuwela, “Va eri ele owo aahimy’awe va, wopaceryani, ‘Nihihelaka mulipiheryo wookhwa wa orukunxa murima, wopaceryani. Nihihelaka mulipiheryo wa orukunxa murima,’ nto va owo oniira, ‘Ohokolowa-tho wa yaawo orukunxa murima. Masi nrowe nikelele ohoolo mpakha oloka voomalela, nihiyaka itthu iya ottuli.” Vano kipacerya osoma. Nto kisoma eversiikulu yootharelana.

Tthiri etthaya enwurya epula enrupeliwaaya imaara sinci-ene, ni enaavaha mihokorokho ale anlima, ennaakhela iparakha sa Muluku:

Masi ele eniima miiwa ni malaxi oonanara, ennikhoottiwa, nto otakhaliwa waya ori vakhiviru; emalelo aya opahiwa.

344 Nto okathi osommy’aka yeeyo, Etthu yaahikitatha. Nto khuupuwela, “Pwiya, eyo khenimuhimya Roy Davis. Xeeni Nyuwo mwaarow’anyu wira yeeyo?”

345 Kipacerya, okhunla nikukhu nikina. Kaahaana orowa ottuli Waya, emaara ekina, “Eyo khinweryaneya w’ale yaatonko omwaleeliwa,” osoma-tho Yeeyo.

346 Vano miyo khuupuwela, “Pwiya, exeeni ila? Nyuwo munihimya-ni, Pwiya?”

347 Vano kaahirukunuwa kitthikela mmuttuphani mwaka, wira kavekele mwaha wa Yeeyo. Nto vairaly’aka, kaahoona olumwenku ovilikeyaka. Nto wothene waahilimmwa, vooreera saana, olumwenku wothene. Nto kaahimoonu mulopwana mmosa aawanre sootteela, eettaka, aahikhalana murupa mmatatani mwawe. Owo aamisa ipyo arowaka siiso. Owo aahirowa mpakha vakompa v’elapo. Nto omalaka-ru orukunuwa, va aarwa mmiravo mmosa aawanre ikuwo sooriipa saana, mutthu ooneya ntoko oowoottha, eettaka ni mwiitiho ntoko sa, awehaka. Aahikhalana epyo. Nto owo aaniriha etthu ottuli waya, okathi waarow’awe aviraka mulaponi; aawehaka atthu othene nto arihaka. Miyo kaaheemela khuweha yoowoona eyo.

348 Vamanly’awe orowa, olumwenku waahivilikeya, nto vale yaahikhala yoohepha yuulupale, saana, nto yaari ya etriku. Ni yaahikhala malaxi oonanara, miiwa ni itthu mutrikuni.

349 Yaahirwa eyuumu. Nto, oh, moota etriku ile yaamukhaani yuuramihaly’aya muru aya mwaamukhaani, ni yaavoliw’aya ntthona mwaha wa maasi. Mwiiwa mwaamukhaani waahuuramiha muru aya, ni waavoliwa ntthona mwaha wa maasi. Atthu othene yaavekela epula. Nto nuvira okathi vakhani, naahirwa neeku nuulupale nto khunaaniha elapo yothene. Nto mwiiwa mwaamukhaani waahituphela osulu, khupacerya okhuwela, “Avuwihwe Muluku! Aleluya! Attotopeliwe Apwiya!”

350 Vano etriku yaamukhaani, yaahituphela osulu, khupacerya okhuwela, “Avuwihwe Muluku! Attotopeliwe Apwiya!”

351 Vano nto Yoolepwa khukirweela, yeeyo emphwanyaneya Multiivuruni mwa Matewu, kapiitulu 5 ni versiikulu 45. Nto nwiriyane ele Yesu ohimmy’awe, mwa Matewu 5:45. Nto nwiriyane oratta-ene vano nisomaka. Matewu, kapiitulu 5 nto versiikulu 45, 46; 44, opacerya.

Masi Miyo kinooleelani wira, Mwaaphenteke awanan’inyu, mwaareeriheke ale anootakhalihani, ni nwiireleke sooreera ale anoonyokhani, ni mwaavekeleleke ale anoohaaxani, ni anoolupatthani;

Wira nyuwo mukhale...mwiihaniwe...nyuwo mukhale aana a Atith’inyu ari wirimu: maana awo annaakumiherya nsuwa ale...ootakhala ni ale... ooreera murima, ni annaarupihela epula anaxariya ni...ootakhala murima.

352 Tivo, moone, epula emosaru eninnuwiha etriku, enninnuwiha mwiiwa. Ni, tivo, kaahiphwanya elatarato ene. Vo ori ole oohimya a erutthu, ori mukereja memmo. Masi mihokorokho sawe...Owo pooti okhuwela, otupha, wiina, olavula ilavulelo; masi mihokorokho sawe: owo mwiiwa. Nto ookhala mukina, orina Erooho emosaru. Erooho Yoowaarya enoowerya okhuruwela nikhuru n’atthu, ni namirima miili onoowerya okhuwela, ni Erooho Yoowaarya, voolikana siiso ntoko mwiiwa ekumi onwery’aya okhala ni epula enveleelihiwa. Ti yeeyo Paulo onlavul’awe va. Masi ti yoohiweryaneya mwiiwa okhala etriku, wala etriku okhala mwiiwa. Munniiwa saana? [Muthukumano oniira, “Amen.”—Mol.]

Tthiri eyo khinweryaneya w’ale yaatonko okhala oomwaleeliwa, khukhalana...mpante wa yoovaha ya Erooho Yoowaarya,

Ni...yaalawinhe masu ooreera a Muluku, ni owerya wa olumwenku onrwa,

...omora, ohokolowela-tho wa yaawo emara ekina...

Nwiriyane etthu ohimaly’awe.

...tthiri epula...enrupela imaara sinci-ene ethhaya, wira enaanihe ni elimmwe va, ni otthokiha;

Masi...seiyo sikhanye miwa ni ikhuukwa, okhooitiwa waya ori vakhiviru;...

Vano, tivo-nto nihiyaka okhulupale ni miixuttiho sa Kristu, nrowe nikelere...oloka voomalela; nihihelaka-tho mulipiheryo wa orukunxa murima ni miteko sookhwa...wa Muluku, ni waamini, ni sikina,

. . . ni miixuttiho s'opatiiso, . . . wiixaatherya *matata*,
ni itthu; . . .

353 Moone, mulipa-oowaamini a erutthu, mahiku ale wu, siiso ntoko siry'aya olelo, ommusivela wira, "Ahe, kiniira mpante wa ekereja. Koolapa. Miyo—miyo kihoorwa, kihiiira elaphulelo. Miyo koopatisiwa." Moone, awo anlipa ni irehereryo iyo s'erutthu. Nto eyo eniira-ni? Enkumiherya miiwa.

354 Oloka voomalela oniira exeeni? Eyo etriku. Etriku ti Masu a Muluku. Owo onrumeela yeeyo ntoko Masu Awe. Eyo Epyo Awe. Eyo enniima.

355 Eyo entthariha epyo xeeni yaaliwe mmurimani mwanyu. Mwaarwaaka okereja paahi mwaha wo wira munoova omooroni, mwaitakaniha ekereja mwaha wo wira khamuntthuna—khamuntthuna orowa omooroni, nlelo mwa mwiiwa. Nyuwo mwa—nyuwo mwaitakaniha ekereja paahi wira mukhale oosuweliwa, nyuwo nlelo mwa mwiiwa. Mwairaka itthu sothene iya sooreherya siri wira siiriwe, nave eyo khukhala yothene murin'anyu, nyuwo nlelo mwa mwiiwa.

356 Masi muKristu, eekeekhai ooloka onimwiilipiha mpakha oloka voomalela mpakha olumwenku okhwa nto nyuwo okhala yoopattuxiwa esya mwa Kristu Yesu. Vano, khinweryaneya wa mutth'uwo okhalakhala amoraka. Ti yeeyo Bibilia ehimaly'awe! Munnoona moota eyo enlikan'aya ni Yoolempwa yothene? Munnoona moota Eyo enihel'aya vaavo vo vooপুরoni vaya?

357 Moota Eyo enwery'aya ohimya va, "Mutthu omanle woopowa khinweryaneya hata opweteya" n'urwa va ni wira, "Masi, nyuwo mwapweteya, wala onyemula, ti yoohiweryaneya"? Khweeli, nyuwo mwakhala namanyemula, khamuhiyo muKristu.

358 "Khaavo mutthu, onlavula ni Erooho ya Muluku, onimwiihana Yesu ootakhaliwa." Yohani Oowaarya 4. . . ahiiso Yohani Oopacerya 4. Khaavo mutthu onlavula ni Erooho ya Kristu, onimwiihana Yesu "ootakhaliwa." Khula erooho, ya Muluku, eri muKereja y'oKristu, enniwanana ni itthu sothene Muluku ohimaly'awe.

359 Hiyo noosoma va, nto eniira, "Owo ohaaxeriwe soottheka sahu. Ni makhwatta Awe noovonihiwa."

360 Muupuwelo wa erutthu wa khalayi oniira, "Mahiku a miiriirya aavira. Miyo ka *Dr. Jones*." Munnona? "Khiivo etthu ene eyo ntoko ovoniha w'eMuluku. Khiivo etthu iyo ntoko etiini enooneya ovara murima. Nyuwo mwa nikhuru noowuukhuleya paahi. Nyuwo murimuukhuleya. Moone, eyo ti yothene ekhanle wa yeeyo. Khiivo etthu wa yeeyo. Hiyo n'aPrespiteriyaano. Hiyo n'aLuteraano," wala etthu p'itthu. "Hiyo noosuwela veemenly'ahu."

361 Masi Erooho ya Muluku enihimya exeeni? Yesu Kristu, mmosaru va! "Amen," enihimya Erooho ya Muluku. Eyo

enniwanana voowaakuva ni Masu. Ayo, mulopwana. Eyo eri vaavo vo. Munnoona entthun'aka ohimya vano?

362 “Irehereryo iya s'erutthu sinruuha okhwa,” ohimye ti Paulo.

363 Masi vale vaphiyale Ekumi, oloka nno voomalela, “Ole oniiwa Masu Aka, onimwaamini Ole okirumme, ookhalana Ekumi ehinimala, ni khonrowa olamuliwa, masi oovira mookhwaani khuphwaya Ekumi. Miyo kinonvaha Ekumi ehinimala, kinoomuhihimuxa mahiku ookiserya. Othene ale Atithi akivahaly'aya animoorwa wa Miyo, ni khaavo mmosa onrowa orimeela.” Khivanweryaneya.

364 Tivo, va t'ile eniira—ele eniira. Atthu anupuwela wira eyo ennaakhaliha atthu ootaphuwa. Munna, khamunimurumeela Muluku vathi vo woopopiha w'enowa. Muluku kahiyo mmosa w'atthu ala a ewaxuxo ntoko enowa yooripa, oniweetihasani mapuro othene. Owo ti Tithi. Owo Mphento. Muluku Mphento. Ni Bibilia oohimya, mwa Yohani Oowaarya, “Ole oniphenta t'a Muluku.”

365 Nyuwo munnimphenta Muluku. Nkaarowa okhala, vaakhanle wira kaamukhuma ni—ni ohapaliwa ohiy'ula. Miyo nkinatoko owurya, kookhalaru. Masi vaakhanle wira kaamukhuma khuhapaliwa, nkaarowa woova owaxuliwa. Kahiyo mwaha wa yeeyo ehinrowel'aka—orowa, nkinrowa wira. Mwaha aya ohinrowel'aka, okhala wira kinnimphenta Owo. Owo onnikiphenta. Kahiyo miteko sa ikano. Kehiyo etthu erin'aka wira. Okhala wira Owo ookiirela etthu miyo, ni miyo kinnimphenta Owo mwaha wa yeeyo. Eyo eri vo.

366 Tivo, ni Erooho ele mmo, yeeyo elaiheriwe, “Miyo kinonvaha Ekumi ehinimala, ni khankhalakhala apweteyaka.” Owo orimootha wala owo ohimye Ekeekhai? Owo ohimye Ekeekhai. Tivo, munnoona moota Ela entaphulel'aya? Ohiweryaneya okhanly'aya wa mutthu omora omanle-ene okhala mwa mahala. Khinweryaneya. Owo pooti omora, khweeli, masi kahi otthikela orukunxa murima, otthikela nipuro ni wira miteko sa khalayi emaara ekina-tho.

367 Tivo nyuwo othene munrowa okhuma muhakalaliho ni muhakalaliho, nipuro nimoso vano nto nikina, khamunoono wira khamukhanle oolipa, khamukhanle oolipihwiwa? Vano, vekeekhai, nyuwo muniira, “Munna Branham, miyo nkisuwenle khama . . .” vekeekhai Muluku khaarowa okivaha orumeyi Owo okivahaly'awe, ni okihiya okhala moovonyani. Nto yahaakhanle yowooniheriwa ni Yoolempwa, weso yaamukhala yoovonyeya, masi *va* eri Yoolempwa wira elipiherye. Ekereja khehaleenle opuro.

368 Atthu anoorowa, wiitakaniha ni ekereja, waakhulana, owana, onyokhana, ni—ni itthu sothene, ni okhala khula enamuna ya makhalelo eerutthu, “Oh, ayo, miyo ka muKristu.”

369 Kihiiwa ehimeryo olelo ya muhano mmosa mwamukhaani okihimenrye wira aiy'awe yaamukhuma ni mulopwana mmosa. Owo ohaaphwanyerya, nipuro nnipuro. Nto muthiyan'owo oniira, "Kintthuna wira musuwele wira, 'Miyo ka muKristu.'" Um-hum.

370 Nkawehani nno wa Jommy Osborne, nno alaleyaka Ttiminku voosiisu; ni bugui-wugui, rock-and-roll ni sothene, woovirani wa esumana.

371 Nkanweheni Elvis Presley, enamuna ya 1947 ya Yuta Isikaroyoti, oniitakaniha ni Asempeleya de Deus, aPentekosite, alavulaka ilavulelo wa Erooho Yoowaarya, ni oroiha minepa sinci-ene woohaaxiwani ovikana makhuru othene o waapeya eviinyu wiiphiini atonko okhala mwa miyaakha miloko mithanu sookiserya. Oohonona muupuwelo w'anamwane aximiravo molumwengkuni mothene, mpakha axiruusi axikhaani yaarul'aya ikuwo saya sa muhina n'urihela vaplataforma wira owo alepe. Oohifayi mpakha awo ahinimoonihaaya mutelevisawuni, okhuma muyuununi mpakha vathi, enamuna erutthu awe. Erooho Yoowaarya, alavulaka ilavulelo, ntoko eyooniheryo? Oh, munna, Erooho Yoowaarya yaakhanle mmo, Eyo khiyaarowa wira siiso. Nyuwo munnisuwela vooreera ovikana eyo. Vekeekhai nnari. Muluku ommusivela oreerela ni oloka ni owaarya.

372 Miyo nkiniira vooreerela ni vooloka ni voowaarya wira kiikhalihe muKristu. Masi Kristu, mwa miyo, t'onikhala eyo mwa miyo. Ni miyo kinnimphenta Owo. Nto kaira etthu p'itthu yoonanara, eyo ennikipwapwela. Vaavo vo kinimwiira, "Muluku, mukilevelele." Khula nihiku, kihaana ovekela oleveleliwa, khula nihiku. Ni nyuwo muhaana, nave. Vekeekhai, muhaana.

373 Masi vano nyuwo mwakhala—mwakhala a erutthu, nyuwo munlipelela paahi ottuli, wira, "Ah, ahe, eri saana, kiniira mpantte wa ekereja." Munnona? Vano nto nyuwo mwaaveehaka, p'ukathi muhirin'anyu Waamini waatonko ovahiwa atthu oowaarya. Vano nyuwo munanyemula Yeeyo, ni wiihana Eyo, "Erooho yootakhala." Wira, "Nle nikhuru na masantu-oophirikeya." Vano, nyuwo munimwiivalaaniha mmansinyu eriyari ya mahala ni olamuliwa, vano moomalamala wa mahiku othene.

374 Yesu ohimnye wira, "Nuulumo nimosa noovirikanya Yeeyo, khenkhalakhala eleveleliwaka olumwenk'ula wala olumwenku onrwa." Nto muKristu, ooyariwa ni Erooho, khokhanle ohimyanaka etthu yootakhala Yeeyo, okhala wira khokhanle. Eyo enniwanana ni Yeeyo. Eyo ekeekhai.

375 Mwaha wa yeeyo atthu aneerery'aya okileela, wira Nripu na Mooro nle vale, ninkhumelela va ni hiyo, awo aneererya, wira, "Nle naari xetwani," wira, "Eyo yaari eyuupuwelelo paahi," yothene ela. Masi kaamera khooniherya wira Eyo khiyaari. Ni

miteko sene siri mme oratta-ene mBibiliani, Nripu na Moor nimosaru naakumanne ni Paulo ephiro awe arowaka oTamasiku. Itthu sothene iya Owo iiraly'awe ottuli wu, onniira oratta-ene enamuna emosaru, ni Bibilia. Ti Kristu, Mwaana a Muluku.

³⁷⁶ Nto okathi oniyariw'ahu vasya, nookhalana Ekumi ehinimala, ni khanikhanle opweteyaka. Yaamukhala yoohiweryaneya mutthu omora. Ti yeeyo Bibilia ohimmy'awe.

³⁷⁷ Vano, nwiriyane, nwehe etthu Paulo onihimy'awe. Kinoosoma yothene ya yeeyo, ni noone vakhala wira eyo kheniweya saana, vano. Nrowe nitthikele, minuutu mmosa paahi. Versiikulu 8.

Masi ele eniima miuwa ni ikhuukwa ennikhooitiwa, ni otakhaliwa waya ori vakhiviru; yeeyo emalelo aya okhanle opahiwa. (Owo ti mulipa-oohaamini.)

³⁷⁸ Vano munwehe Paulo. "Masi, oophentiwa, . . ." Vano owo onlavula mwaha w'awo ophavelaka otthikela vathi va ikano, moosuwela, yiilipihaka wira evare miteko sothene sa ikano, nnya iyo miirelo paahi ntoko sinweryaney'aya okhala. Awo aakhallana opatiiso ni wiixaatherya matata, ni itthu iya sothene.

Masi, nyuwo oophentiwa, hiyo ninnaamini itthu sooreera sa nyuwo, . . .

Eyo vo. Munwiriyane yoowo vano.

. . .ni itthu simphwanyiha woopowa, nnamwi—namwi mwa yeela nilavulaka siisa.

Muluku kahiyo oohikhala a xariya vooliyalaka miteko sanyu ni soovara sa mphento, yoowo nyuwo mooniheny'anyu mwa nsina nawe, mwa yoowo nyuwo muwiireny'anyu atthu oowaarya, ni muniwiirel'anyu.

³⁷⁹ Munnoona etthu enihimy'awe? Owo khonlavula mwaha wa aKristu emoraka, ohiweryaneya ohokolowa. Owo onlavula mwaha w'alipa-ooaamini a erutthu ale anvira mwa enamuna ya erehereryo. "Masi," owo ohimmye wira, "wa nyuwo muyariwe vasya, nyuwo mukhanle muKristu, oophentiwa, hiyo ninnaamini itthu sooreera wa nyuwo. Nyuwo khamunihimya itthu iyo. Nyuwo khamunikhala enamuna yeeyo ya makhalelo. Nyuwo moolipa ni Kristu."

Owo ohimmye exeeni ottuli nno? Vano nrowe nirowe mwa aHeperi 10, vaavo naary'ahu-vo voosiis'ula, emaara ekina. [Nipuro vahitthu mufiitani—Mol.]

³⁸⁰ Vano nrowe nikhunle vaavo, tho, aEfeso 4:30. Ni nrowe nikuxe ela, minuutu mmosa paahi, ni niwehe etthu ela enihimy'aya, wira elipiherye yeela, wira niirihe Yoolempwa elikane ni Yoolempwa. aEfeso 4, nrowe noone. aEfeso 4:30. Nrowe nisome ni noone etthu Eyo enihimy'aya. Nwiriyane.

...muhiripihe murima Erooho yoowaarya ya Muluku,...

Sayi—hiyo nimpatisiwa sayi mw'Erutthuni mmo? Erooho emosa.

...muhiripihe murima Erooho Yoowaarya ya Muluku, yeeyo nyuwo mutthitiw'anyu ekanyero mpakha Nihiku no woopoliwa wanyu.

Eyo ekeekhahi? Nyuwo muntthitiwa mw'Erutthuni ya Kristu, ni opatiiso wa Erooho Yoowaarya, kahi okhuma muhakalaliho mmosa murowaka mukina, masi mpakha Nihiku no woopoliwa Erutthu. Ti yeeyo nyuwo mukhanly'anyu. Tivo, khiivo hata enamuna ya nyuwo opweteya.

³⁸¹ Nyuwo munootuthuwa. Ni mwaha wa yeeyo otuthuwa, otuthuwa, woova onveleela ohoverya.

Ophenta onveleela waamini. Miyo kinnaaphenta Atithi aka. Miyo nkiniwoova Awo, okhala wira kinnaaphenta Yaawo. Awo khiyaarowa okisikuliha. Awo anookiirela yooreera. Vaakhanle wira kaamwaatuthuwa Awo, ni, "Oh, nkisuwenle khama Awo animwiira, wala nnari." Munnona?

³⁸² Masi kaaphentaka Yaawo, "Ayo, Tithi, miyo—miyo kinnoophentani Nyuwo. Ni koosuwela wira Nyuwo mwa—Nyuwo mw'Atithi aka, ni Nyuwo munnikiphenta, ni nkinoova wira Nyuwo khamunrowa omaliherya Masu Anyu. Owo natiri Anyu wa miyo." Ti siiso Erooho ya Muluku eniir'aya.

³⁸³ "Masi, oh, ankhi kiirale *ela*, ankhi kiirale *ele*." Moone, vo nyuwo munoorwa epantte y'otthariha ikano, tho. Muhikhalakhale murowaka epantt'iyo y'otthariha ikano. Ti yookhotteya.

³⁸⁴ Epantte yo weemereryeya t'ile nyuwo muntthun'anyu. Ti muteko woomalihiwa. Kristu ohookhwa, ni etampi yiiviwe okathi Owo okhwiw'awe. Nto vakhala wira Muluku ohootthokiheryani khalayi ene Ekumi Ehinimala, "Othene ale Atithi akivahaly'aya, animoorwa wa Miyo." Nyuwo muri vo, khamukhanle opweteyaka. Nyuwo moolipa wa mahiku othene. "Maana mwa Erooho emosaru hiyo othene noopatisiwa mw'Erutthu emosa, ni ni mukuttho mmosa Owo ooreeriha voomalela wa mahiku othene." Eyo eri vo. Khiivo hata enamuna ya hiyo opweteya. Voolikana. Vano, eyo kheniwoonihani oreera?

³⁸⁵ Vano, munsuwela sayi wira mwa muKristu? Okathi erooho anyu enkhalel'aya onamooni ni Erooho Awe, okathi ophenta wa Muluku onkhal'aya mmurimani mwanu, okathi onkhalan'anyu, mphento, ohakalala, murettele, ovilela, othunku, ovilela, oreera murima, wiisumaaliha. Owo p'ukathi nyuwo... Mihokorokho sa Erooho sintthar'aya makhalelo anyu.

³⁸⁶ Kahi mwaha wo wira munniwerya wiina mwa Erooho, oh, wa maipelo ala a vano, okumiherya onyakula wunci-ene

vapiyaanoni, wa yinci-ene ela nno wiina mwa Erooho. Itthu iyo siri saana. Masi awo arooroiha etthu yothene epantt'iyoy'otthariha ikano, moone, nto tivo, awo aahiya Erooho ya Muluku ottuli.

³⁸⁷ Mwaha wa yeeyo, okathi Muluku opaceny'awe wiisooniherya Mmansawe, awo yiiraly'aya, "Ethiru. Hiyo khanintthuna hat'etthu ni Yeeyo." Awo khammusuwela Muluku. Awo khanatoko wona Eyo. Awo khanwerya osuwela saana Eyo, okhala wira eri ekumi yoovirikana mmo. Owo khonsuwela, mwiiwa khonsuwela ele etriku eniir'aya. Eyo ekumi yoovirikana.

³⁸⁸ Eyo t'inamuna ery'aya ni muKristu, wa mulipa-oowaamini a erutthu, namahimya, onkhuma n'uhimya, "Oh, ayo, miyo ka muKristu." Sikaro muulupale mwaano mwawe, ntoko emompe yookhuliwa manyaka ya oTexas.

³⁸⁹ Muthiyana onwanre kaputtula awe, oniira, "Oh, ayo, miyo ka mempuru a mukereja. Khweeli ka yoowo." Mihokorokho sanyu sinnooniherya wira khamuhiyo hat'etthu woohikhala a erutthu. Ti yeeyo. Vekeekhai, ti yeeyo. Eri etthu emosa paahi enikumiherya yeeyo: eyo onkhala ovahuwa muupuwelo wala erooho ya ithama mwa nyuwo. Ti yeeyo.

³⁹⁰ Mwaatthunaka wira ntoko olumwenku, Bibilia ohimye wira, "Mwaaphentaka olumwenku wala itthu sa molumwenkuni, ophenta wa Muluku hata khokhanle mwa nyuwo." Nto eyo eri vo.

³⁹¹ Vano, nyuwo muniira, "Oh, Bibilia oohimya, nto kihaana wira yeeyo." Nnari, eyo kahi siiso. Mukhale va mpakha Kristu owiireleni etthu, enkumiha eyo mwa nyuwo. Vano munooyariwa ni Erooho ya Muluku. Kahi ele muniir'anyu, t'ile Owo owiireny'aweni nyuwo. Mpakha nyuwo ophwanya ophenta wira moovira mookhwaani khuphwanya Ekumi. Vano nto nweheke makhalelo anyu, vakhala wira—vakhala wira annilikana. Kahi mwaha wo wira muneererya okhaliha makhalelo anyu, masi mwaha wo wira Muluku onooruhani mo wiiwelela Erooho Awe. Khamuhiyo nyuwo munihoolela mphironi mwa Muluku. Ti Muluku onooholelani mphironi mw'Awe Yoowo. Kahi nyuwo munihoolela, masi Muluku ahoolelaka.

³⁹² Vano nwehe ela, vano, okathi onikhuveel'ahu woomalelani. Versiikulu 11.

Nto hiyo nimphavela wira khula mmosa a nyuwo ooniherye othokorerya omosaru wo olipa voomalela wa nrromelo mpakha wookiseryani:

Wira muhikhale oonyoonyiwa, masi atthu anaatakiha ale mwaha w'owaamini ni ovilela animwaakhela natiri.

³⁹³ Vano, moonelo mmosa paahi va.

*Tthiri okathi Muluku ammanenly'awe natiri
Abrahamu, okhala wira khaakhanle mutthu
muulupalexa wira amulaphele, owo aahiilaphela
mmansawe,*

*Ahimyaka wira, Vekeekhayi kireerihaka
miyo kinimooreerihani, ni kincereryaka, miyo
kinoowuncereryani.*

394 Okathi Muluku aakumann'awe ni Abrahamu! Vano, Abrahamu aahaakhela waataana, sihikhanle hata iphwanelelo nnakhala. Waataana waapakiwe ni Abrahamu. Awo mahala mara, voomalela. Abrahamu khaari mutthu oolokaxa. Owo khaari mutthu a owaarya. Owo aari mutthu pure paahi. Nto Muluku, mwaha w'othanla, khimuthanla Abrahamu okhala wira Muluku aaroomuthanla; kahi mwaha wo wira Abrahamu aarootthuna, mwaha wo wira Abrahamu aarimwiira *ela*, mwaha wo wira owo aari mutthu ooloka, mwaha wo wira owo aaniphwanela nnakhala. Masi waari othanla wa Muluku. Muluku aamukunxe Abrahamu.

395 Olelo, ntoko sihimaly'aka, kookupali, "Hiyo nnimwaathanla alaleyi ahu." Hiyo ninoorowa, wira, "Ahe, mmosa wa matiyaakono oohiya. Nrowe nimphwanye mutthu oolokaxa mpaani wira akhale opuro awe. Ahe, pastore oohiya; nrowe nimphwanye, nimukuxe oolokaxa." Imaara sikina eyo kehiyo yooerera.

396 Okathi awo yaamuthanlaly'aya mutthu wira akhale nipuro na Yuta, awo yaamukunxe mutthu oovonyeya. Awo yaamukunxe mulopwana oolakeya, Matiaxi, mulipa-oolopa muulupale, oosoma, namu-rummwa. Awo yiirale, "Owo vekeekhai onookhala nipuro n'eekeekhai. Moone, owo onkhala ntoko mutthu eekeekhai." Masi khiwaari othanla wa Muluku. Nto owo aamukunxe mutthu ula, ni owo khaatonko omwiirela hat'etthu Muluku.

397 Masi Muluku aamuthanlale muYuta mmosa, mukhaani a mukhalelo wooviruwa, a ephula yookhoropana aaronwe iwe ni wiitho wawe wothene, "Miyo kinoorowa. Kinoorowa waatthukwa awo."

398 Muluku khwira, "Miyo kinnoona etthu mwa yoowo. Kinoomurumeela yoowo."

399 Nto Muluku aahimukhumelela ohoolo wawe mwa Waarya wuulupale iwe. Nto owo khwira, "Nyuwu mw'Ani, Pwiya?"

400 Khwira, "Miyo ka Yesu. Vano, ti yoorika wa nyuwo owana nvirikanyaka masooso. Munikilupatthela-ni?" Ntoko siiso, nto Muluku aahimukuxa mutthu *uwo* khimukhaliha mmosa w'axilopwana aalupalexa yaatonko okhala elapo ya vathi okhuma Yesu Kristu. Iwo waari othanla wa Muluku.

401 Olelo, nineererya othanla. Nyuwo ikereja, nyuwo munoomuruma mutthu *ula* nno, ni mutthu *ule* nno. Kherina wiiriwaka siiso. Muluku t'oneettiherya. Ti Muluku mwa sothene, mwa sothene, vasulu va sothene; kahi ele ettikitti emosa ya ekereja emosa. T'ile Muluku ohimaly'awe, enikhaliha evirikanelo.

402 Nwehe. Muluku aamanenle natiri Abrahamu, voohiphaveleya etthu. Nto vano, mulipelele, Abrahamu khaarina wira etthu emosa. Muluku iirale, "Miyo kihira eyo."

403 Muluku ammanenle natiri Atamu, khwira, "Atamu, nyuwo mwaahikwanye *ola*, munookhala mahiku othene. Masi nihiku munrow'anyu olya, nihiku nenlo munookhwa."

404 Atamu khwira, "Miyo kinniikoha paahi enihimmwa exeeni, khula enamuna?" Owo onoorowa vale khulyaaka, aikelihaka.

405 Khula okathi Muluku ompak'awe. . . mutthu ompak'awe waataana ni Muluku, ahiiso Muluku ni mutthu, mutthu onoonona mpante awe. Tivo Muluku aahaana wira etthu, okhala wira Owo aahoona ele mutthu aary'awe. Nto awo yaahithommwa khalayi ene, yaahithanliwa, nto Muluku aahaana wira etthu. Tivo Muluku aahikhuruwa khupaka waataana Wawe n'Abrahamu, voohiphaveleya etthu. Vahaakhanle wira waari voohiphaveleya etthu, Abrahamu aamwiira orimeenle, okathi wa khalayi.

406 Nkanweheni owo okilaathi iwe oGerari, ootthikela ottuli, ahimyaaka etthu yoowootha. Ni khunvaha mwaar'awe mulopwana mukina, wira oopole esapala awe. Mulopwana xeeni! Okilante-ene vale, ni oothikela ottuli. Muluku aahimuhimeerya, wira, "Muhikhume va. Mukhale vaava." Etala khimukumiha. Owo aahirowa weiwo waary'aya wookhweyaxa ophiya-wo. Moosuwela etthu enimukhumelela mutthu okathi onikux'awe ephiro yookhweya.

407 Owo aaheetta arowaka, iwe weiwo malaxi yaary'aya ooripelelaxa. Nto vaphiyaly'awe iwe, aahimuhimeerya mwen'ole wira amwaar'awe yaari amurokor'awe, wira oopole esapal'awe. Vano, iwo waari wootha. Ni khula mulopwana, aammukuxa mwaar'awe ni anvahe mulopwana mukina, wira oopole espal'awe! Owo aari iwe, okilante-ene vale muheemani yaamukhaani, namatthikela ottuli, oothaka, ni voomalela ota wa yawawe. . . ookhottihiwa voomalela natiri ni itthu sothene, masi owo nlelo aari profeta a Muluku.

408 Nto iwe aari Apimelekhi, owo aari mutthu ooreera murima, a osantu. Khweeli, aaniira mavekelo awe khula ohiyu. Khumphwanya piipi ula, a miyaakha emiya, aarwiiye iwe, ooreera ni mwali tho. Owo khwira, "Owo ti mwali kaamulipelel'aka, tivo kinrowa omuthela tu."

409 Abrahamu khwira, "Pooti omukuxa. Owo murokor'aka."

Owo khwira, “Owo ti murokor’aka.”

410 Tivo owo animuroiha iwe khwaaruma axithiyana wira emurapihe othene owo ni—ni enwarihe ikuwo sooreera, ni emphwanelihe ntoko—ntoko pwiya mwene. Nto owo aahiira mavekelo awe, khwiisaatalela voolilini, khurukunxela inawu sawe osulu, khwira, “Meelo, kinoomuthela mwali ule muHeperi ooreera, ole—murokor’awe mmirav’ole iwe. Oh, enookhala yoorerexa. O Pwiya, Nyuwo moosuwela moota onooophent’akani Nyuwo! Ayo, mulopwana. Yoothamaleya!”

411 Nto Muluku khwira, “Nyuwo muri ntoko mutthu ookhwa.” Uh-huh!

412 [Munna Branham onookothomola—Mol.] (Kileveleliwe.) Abra-. . . Vano, Abrahamu aakilanthe iwe, oothaka, ootthikela ootuli. Nto nno aari mulopwan’ola, mulopwana a nneema ni a xariya ni ooloka. “Vano,” owo khwira, “Pwiya, Nyuwo moosuwela exariya ya murim’aka. Owo khokihimenrye, wira ole aari ‘murokor’awe?”

413 Khwira, “Miyo koosuwela exariya ya murim’anyu. Mwaha wa yeeyo Miyo kinookhottihery’akani wira muhikitthekele Miyo. Ti yeeyo. Miyo kinnisuwela exariya ya murim’anyu. Masi iy’awe profeta Aka.” Aleluya! Oh, awo yaahikhale mahala, exeenii? “Ootthikela ottuli, ahimyaka etthu yoowootha, ni okilanthe-ene vale, masi owo nlelo profet’Aka. Mukuxe mwaavulo, murowe wa yoowo, ni mmuhokoloxe mwaar’awe, ahiiso nyuwo mwa mutthu ookhwa. Miyo nkinrowa wiiwatho mavekelo anyu. Mmutthuniherye owo oovekeleleni.” Amen. Nyuwo muri vo. “Owo profet’Aka.”

Vano, nyuwo muniira, “Oh, kaanithuna kaakhanle Abrahamu.”

414 “Vakhala wira hiyo nihookhwa mwa Kristu, hiyo na Osuulu w’Abrahamu, ni alipa-oorithi voomutthariha natiri.” Khweeli. Ti yeeyo Bibilia ohimaly’awe. Mwaanithuna osoma Yeeyo? Vano, Bibilia ohimnye wira—wira natiri khaari paahi a Abrahamu ni osuulu awe. Ntoko nyuwo. . . Abrahamu aahikhalana osuulu munci-ene, khweeli, aana anci-ene. Iximayeli aari mwan’awe. Owo aarina aana athanu n’aili wala athanu n’araru numala Saara okhwa, ni mukina, Ketura. Masi, nwehe, osuulu waari ole oolaiheriwa, yoowo aari Isakhi, ni mwa Isakhi khurwa Kristu, mwa Kristu khurwa hiyo. Natiri ti voohiphaveleya etthu.

415 Vano, ankhii Abrahamu? Vano, owo aamwiira iirale-ene, yaamwiira ekhanle-ene yoohiweryaneyya owo ohokolowa-tho. Vekeekhai. Yaamukhala yoohiweryaneyya Sawuli ohokolowa, vaakhanle wira eyo, mwaahaana osoma Yoolempwa siiso. Munnona? Masi khayaari. Natiri a Muluku onookhala mahiku othene.

416 Nrowe nisome va minuutu mmosa paahi. Kintthuna wira musome Yeeyo. Kintthuna wira mwaakhunle aKalasiya 3:16, nto

musome ela, ni nimoone ole okhanle natiri, moone sinto—sinto hiyo na natiri Awe wala nnari, 3:16. Nwiriyane va. Vaareera. Kinrowa osoma eversikulu 15, nave.

Axinna, kinlavula ntoko mweettelo w'atthu; Hata okhalaka waataana onipakiwa ni mutthu, wamala-ru olupiheriwa, khaavo onttipiha, wala onaacererya mmo.

Vano wa Abrahamu ni osuulu awe, (Osuulu, o-s-u-u-l-u.), n'usuulu awe aahimaneliwa natiri.

“Wa Abrahamu ni Osuulu awe.” Vano nwehe.

Owo khonihimya wira, Ni axisuulu anyu (oowaatta), ntoko anci-ene; masi ntoko... mmosa, Ni wa osuulu anyu, okhanle Kristu.

⁴¹⁷ Vano, Kristu aari Osuulu w'Abrahamu. “Ni hiyo nikhwaaka mwa Kristu, ni opatisiwa mw'Erutthuni Mwawe, hiyo na Osuulu w'Abrahamu, ni n'atthu oomurithi natiri.” Vano eri sayi, munrowa okhalakhala sayi mmoraka, vakhala wira Muluku ohoomanelani natiri nyuwo? Munrowa okhalakhala sayi mutthikelaka ottuli, ni wiivalaaniha ni okhala oorowaka omooroni mwaha wa yeeyo?

⁴¹⁸ Vano, nyuwo muniira, “Ahe, khanikhanle otthikelaka ottuli?” Voomalela. Nto nyuwo mwatthikela ottuli, munooliva eyo, muhivela-vele. Abrahamu aahiliva, nto akina aya yaahiliva, ni nyuwo munooliva. Nyuwo muhuupuweleke wira eyo enoovahani ehaakhi yo wira etampi. Eyo khenoovahani. Munooliva mwaha wa sothene siniir'anyu. Munoohepa ele munaal'anyu. Nyuwo mwiire etampi emosa yaamukhaani nto munoohepha epasiya y'orapela yothene yoosarya. Ti yeeyo. Masi, munna, eyo khenihimya wira moopweteya. Eyo ekeekhaii voolikana. Abrahamu aahihepha yeele owo aalaly'awe. Ti yeeyo. Masi owo nlelo aahoopowa.

⁴¹⁹ Waataana Muluku aapakaly'awe ni Isarayeli: awo yaahipwetexa yoorithi aya, awo yaahipwetexa muttethe wa natiri khurowa wEjitu, masi awo khayaapwetexale waataana waya. Muluku iirale, “Miyo kinnimuupuwela natiri Aka wa Abrahamu. Miyo kinnimuupuwela, nto Miyo kookhuruwa wira kaavuluxe atthu Aka. Murowe iwe, Moise, mwamuleele Farawo, wira Miyo koohimya wira, 'Aahiye atthu Aka erowe.' Miyo kinnuupuwela wira kommanela natiri Abrahamu ni osuulu awe.”

⁴²⁰ Eyo etthu emosaru ni hiyo. Tivo vakhala wira nyuwo muhookhwa, nto ekumi anyu yoosukiwa mwa Muluku, vamosa ni Kristu, khiivo hat'etthu molumwenkuni enwerya wookwanyani. Vano, nyuwo pooti orowa ni wira etthu yoovonyeya, masi nyuwo vekeekahi, mwakhala-ru, vakhweeli, mwaana a Muluku, ni khoona wira moovonya, munoovenya mwehererye tho. Ti yeeyo, ni khamunrowa ohala vaavo.

421 Masi nyuwo mwakhala oowova, mwakhala mwiiwa, waahikhale-ru “ovenya” wa nyuwo, nyuwo munimwiira, “Ah, ahe, khiyaakhanle hat’etthu wa Yeeyo, khula enamuna.”

422 Omwene wa Muluku ori ntoko mutthu aakunxe ntthavi khurowa opahari, khuriha. Okathi orwiiy’awe, owo aahikhalana akasa, anaphulu, inowa, anaakhwiiiti, aranttaasi, ni ihopa. Eyo ti Ehapari yooreera okathi Eyo enlaleeriw’aya.

423 Ntoko Apwiya yaarow’aya omuhimeerya murumeyi, ntoko Munna Graham, “Murowe *nno*. Murowe nlootho *nla* mwamiserye okathi vakhani, Munna Graham.” Vaareera, onookuxa ntthavi nawe nto onoorowa iwe khupacerya otothela.

“Munrowa woowi, Munna Bill?”

“Kinrowa nipuro nikina, nto karihele nlootho *nla*.”

424 Kinoopurula, “Awo vo, Pwiya, Nyuwo munnaasuwela ele akhanly’aya.” Miyo kinoopurula ntthavi emaara ekina, “Vaareera, ala ari va, Pwiya.”

425 Vano, kasa aari kasa, opacerya wene. Nyuwo muroovariwa paahi muntthavini. Ti yeeyo. Nto eyo t’inamuna atthu aniihiy’aya okuxiwa ni eyuukhuwelo, “Oh, aleluya! Aleluya! Attottopeliwe Apwiya! Avuwihawe Muluku! Aleluya!” Awo anoovariwa muntthavini paahi, ti yeeyo tu.

426 Erooho ele ya khalayi ya kasa yakhala-ru mwa yaawo, khivanrowa opisa, awo aniira, “Ahe, kinimooleelani, . . .” Owo onrowa va, apurelayaka atthikaka.

427 Nto muhano Mwiikhampa onimwiira, “Masi nkinwerya osuwela saana Yeeyo.” Munnona?

428 Muhano Ranttaasi onookhala vale okathi vakhani, owo oniira, “plop, plop, plop,” atthikaka, “Ahe, khiyaakhanle hat’etthu mwa Yeeyo, khula enamuna.”

429 Muhano Enowa onimwiira, “Oh, awo nikhuru na masantu-oophirikeya. Eyo ti yothene ekhanle mwa Yeeyo. Miyo kinoorowa nipuro atthu arin’aya ankhili ooloka ovikana ele.” Vano, nyuwo mwa enowa, opacerya wene. Ntthavi na Ehapari yooreera naarimoovarani paahi, ti yeeyo tu.

430 Masi ehopa enooroihiwa va meesa va Mwaneene. Owo aari ehopa, opacerya wene. Epyo ya yoowo yaari ehopa. Owo opacenyre, ntoko ehopa, ni Muluku aanisuwela ihopa s’Awe okhuma wopattuxiwani w’olumwenku. Aleluya!

431 Muupuwele, iyo sothene simmumula mmaasini mamosaru a marove iwe. Iyo sothene simmumula muratthi mmosaru. Ti yeeyo. “Hiyo othene nihiira . . . ninwurya vaMwala mmosaru wa erooho. Othene yaahilya emana mothakoni.” Kalebi ni Yoxuwa yaalyanse emana emosaru ale—ale akina yaalyiyi’aya. Nto awo othene yaahimora mothakoni. Masi yaahikhala aili oothanliwa wira elapuwe, nto awo yaahilapuwasa. Ti yeeyo.

432 “Hiyo othene nookhalihwi wira niwurye v’Ephattuweloni emosaru.” Masi kahi wira othene ole onwurya onimooopowa. Hiyo othene nookhalihwi wira nikhuwele vamosa. Hiyo othene nookhalihwi wira nihakalale vamosa. Masi Oothanliwa t’onoopowa. Mooweha? Ehimmye wira, “Irooho soopiili, mahiku ookiserya, saarowa okhala soolattanexa mpakha saarow’aya owoototha ale Oothanliwa vaakhanle wira vaaniweryaneya,” *vaakhanle* wira vaaniweryaneya. Munnona? Eyo Erooho y’ekeekhai ya Muluku, oothanleliwa Ekumi Ehinimala.

433 Vano ninoomaliha. Nto Munna Neville onootthikela vahiyaly’aka va. Vaareera.

Nto ela miyo kinihimya, wira waataana, waahilipiheriwa khalayi ni Muluku mwa Kristu, ikano, sirwiye nuwira miyaakha imiya xexe, miyaakha imiya xexe ni miloko miraru ohoolo waya, khasinwerya omuttipiha, wira simukhalihe natiri ohivar’etthu.

Owo ti natiri Muluku aamuvahaly’awe Abrahamu, ikano shinatthi hata ophiyererya okhala.

Nto vakhala wira—nto vakhala wira yoorithi enikhuma wa ikano, weso khehiyo-tho ya natiri: masi Muluku aahinwaha Abrahamu ni natiri.

Kahi mwaha wa hat’etthu muniir’anyu, kahi mwaha wa hata ikano, hata ikano sa ekerej’anyu, mwaha wo wiitakaniha ni ekereja, wala ekano ekina. Awo vekeekhai mahala a Muluku, wa nyuwo. Eyo eri vo.

434 Nwehe.

Weso nto sikhalenle-ni ikano? Iyo saacereriwe mwaha wa sootheka, mpakha osuulu orwa yoowo waamaneliwe natiri; . . .

Eyo kehiyo yowooneya ntoko ephula wiitho waka? “Iyo saacereriwe, wira sirumeeliwe mpakha Osuulu orwa, yoowo aari Kristu, Yoowo aamaneliwe natiri.”

. . .ni siruuihwe ni malaikha ni mmatatani mwa mulapeli.

Vano mulapeli kahiyo mulapeli a mutthu mmosa, masi ori Muluku mmosa.

435 Vano, miyo kinihya va, opacerya vaavo wira Munna Neville, wa Namararu ila enrwa.

436 Vano nyuwo munnisuwela etthu nihimaly’ahu? [Muthukumano oniira, “Amen.”—Mol.] Eyo vekeekhai ti yoohiweryaneya wa muKristu ooyariwa vasya wira. . .Miyo nkinihimya, vano, ole *oniisiihana* mmansawe, “ooyariwa vasya.” Kinimuhimya muKristu, eekeekhai, ooyariwa vasya, wira onookhalakhala amoraka mwa mahala, owo khokhanle wira.

Owo pooti omora, eyo ekeekhaii, masi khokhanle, nnakhala, okhumaka mwa mahala.

Abrahamu aahimora mwa mahala. Vekeekhai, owo aahimora. Muluku aamuhimenrye wira “akhale weiwe.” Owo aahikhuma mwa yeeyo, masi owo khaapwetenxe waataana wawe. Owo nlelo aari oothanliwa a Muluku. Owo aari profeta ary'ene iwe. Owo okathi wothene aahikhala. Owo okathi wothene onookhala a Muluku.

⁴³⁷ Vano nwehe. Bibilia ohimmye, wira, “Isarayeli othene onimooopowa.” Akavi answela yeeyo? Bibilia ohimmye wira, “Isarayeli othene onimooopowa.” Vano, “Isarayeli kahiyo Isarayeli okhanle a erutthu, masi Isarayeli a Erooho, wira soovaha ni wiihaniwa sinikhala w'ohirukunuxa murima.” Ti yeeyo Bibilia ohimaly'awe, eversikulu enttharelana? aKalasiya. Vaareera. “Isarayeli othene onimooopowa. Khula mmosa a awo t'owoopowa.” Moota xeeni onkhal'ahu Isarayeli? “Nikhwaaka mwa Kristu, ninkhala Osuulu w'Abrahamu, ni n'atthu oorithi ntoko saaroromelinhawe.”

⁴³⁸ Paulo ohimmye wira, “Ole ori ota khahiyo muYuta, masi ole ori muhina, ti muYuta, Ale oolaiheriwa natiri.” Ni hiyo na Osuulu w'Abrahamu, mwa natiri, mwa Kristu, nimukupaliki Yoowo okhala Moopoli ahu.

⁴³⁹ Oh, kinroromela wira munnoona. Kinroromela wira munniiwa saana, mwawerya-ru okhala ni Yoowo okathi vakhani. Vano vaava hiyo ninoomaliha ela, nto ninoopacerya ni Melikhiseteki, yoowo ontikiherya-tho alukamaka yeela. Ninoopacerya naanaanoru va . . . Oh, Eyo paahi, etthu yothene ti yooreera. Masi nintthikela paahi nikelaka mwa etthu yeeyo yootikana.

⁴⁴⁰ Vano, moone, nyuwo mwakuxa Ela *va*, enkhala ntoko, vaakhanle wira mwaamuwerya osoma Eyo ntoko eweheryo paahi, ntoko Naoraaru eekeekhai oolipa, onaamini wira ari aMuluku araru, aakihimenry'awe emara emosa, wira, “Matewu 3 vekeekhai ohimmye wira aakhala araru, Atthu araru oomeekha mwa oMuluku.”

⁴⁴¹ Miyo khwira, “Kihaana woona.”

⁴⁴² Owo khwira, “Nwehe.” Keemenleene vapulpitu va, owo khwira, “Nkawehani va, Matewu 3,” khwira, “Okathi Yesu okhumaly'awe mmaasini, moone, erimu yaahimutthukuwela Yoowo, nto Owo aahoona Erooho ya Muluku ntoko epompa. Ni Nsu okhuma Wirimu nihimyaka wira, “Ola Mwan'Aka onimphentex'aka, mwa Yoola Miyo kinnitteeliwa murima.” Ni yaahikhala araru: Mwaana mukerekhere mwa muro; Erooho Yoowaarya eriyari; ni Atithi osulu.”

Miyo khwira, “Munna, Yoolempwa khenihimya *siiso*.”

“Oh, ayo Eyo ennihimya!”

Miyo khwira, “Vano musome-tho Yeeyo, musuwele sinto Eyo ennihimya.”

443 Vano, va eri elatarato awe. *Va* ori Muluku, Mwaana; *vale* ori Muluku, Tithi; *va* ori Muluku, Erooho Yoowaarya, ntoko epompa. Vano nwehe. Bibilia ohimye wira, okathi Yesu waapatisiw’awe, “Mwaana aahikhuma mmaasini, va, erimu vasulu Vawe yaahitthukuwa. Nto Nsu nihimyaka wira. . .” Owo aahoono Erooho ya Muluku, Erooho ya Muluku, ntoko epompa. Kahi Mutthu mukina osulu *iwe*, masi Erooho ela ya Muluku yaari Epompa yaari vasulu Vawe, nto Nsu nirwaaka, niiraka, “Ola Mwan’Aka onimphentex’aka, mwa Yoola Miyo onnikisivela okhala.” Vano mmusome Matewu 3 moone sinto khenihimya yeeyo. Munnona? Kahi Atthu araru, nnakhala tu.

444 Nto ti siiso. . . Ela khenihimya wira ti yoohiweryaneya wa mutthu okhalakhala atthikaka, nto, okathi onthhikel’awe ottuli. Eyo khenihimya yeeyo. Eyo khenihimya yeeyo. Eyo enihimya wira, “Ti yoohiweryaneya wa mutthu okhalakhala atthikaka wiilokiha mmansawe, owo otonko-ene okhala vaavo.” Owo khonwerya wira.

445 Bibilia ohimye wira, “Ole oniyariwa ni Muluku, khaniira etampi, owo khonwerya wira etampi. Okhala wira Epyo ya Muluku enikhala mwa yoowo, ni owo khonwerya wira etampi.” Vanweryaneya sayi miyo wiihaniwa natampi, okhanlene mukuttho omphwanyaneya vale wira okhale opuro aka? Vanweryaneya sayi miyo okhwa, okhwa oliveriwe-ene mwaha wa miyo? Vanweryaneya sayi miyo okhwa, kirine-ene Ekumi Ehinimala? Kinwerya sayi wira eyo? Khamunwerya wira.

446 Vanweryaneya sayi miyo okhalana eyeemiheryo yolempwa ni mukhulupale a mpooma, wira keettiheke ikilomo miloko mithanu na mixexe khula ewoora mpooma mu, vano muhooleli onakivara mwaha wo weettiha ikilomo miloko mithanu na mixexe khula ewoora? Muniwerya sayi wira? Kookhalana eyeemiheryo ya mukhulupale enihimya wira pooti wira. Owo khokhanle okivaraka. Wawawe—okivara wawe, owo aamuwerya woopa epiitu ni itthu sothene, nto miyo kaamuwerya oliyala tu. Khenihimya etthu; miyo kookhalana eyeemiheryo.

447 Nto kinwerya sayi miyo, nto, numala Kristu okikhwela ni miyo khukhala exariya Awe mwaha wa mahal’Awe ni mphento wa miyo? Kinwerya sayi wira etampi, ekhanle-ene etthu omphwanyaneya eriyari ya miyo ni Muluku, mukuttho? Miyo nkinwerya wira etampi. Khivanweryaneya wira eyo. Muluku khonikoona miyo; Owo onimoona Kristu. Owo onkhala nipuro naka. Nto miyo kairaka etthu p’itthu yoovonyeya, Kristu t’onkhala nipuro naka. Miyo kiihira elapelo aka, “Miyo koovonya. Owo t’oloka. Pwiya, Nyuwo munnisuwela murim’aka. Nyuwo munnisuwela sinto kinihimya n’ixariya wala nnari. Ni miyo koovonya. Mukilevelele.” Muluku khonoona eyo. Ephome

ya Yesu ennikikhuneela, okathi wothene. Vano vanweryaneya sayi Muluku okhalakhala akoonaka? Vanweryaneya sayi etampi ohi—miyo ohimyaniwa, Owo ohiweryaka wira? Kimalaka-ru wira, ti yooleleliwa. [Munna Branham oruminhe ekatha awe—Mol.] Ti yeeyo.

⁴⁴⁸ Siiso ntoko okuxa e—eyaalikelo mattoittoi ekhaani ntoko *ela*, eyaalikelo ekhaani ya mattoittoi ya maitho, ni okuxa yoosareya etinta yooriipa khuvarelela ni ekamela ya kolooru, ni omoroxela memmo, vano khunaphavela ophwanya-tho. Eyo enoothatuwa khukhala kolooru. Etinta enkhala kolooru. Nto ti siiso, itampi sanyu silampwe, mwakhala-ru mwa Kristu. Eriyari ya nyuwo ni Muluku enkhala ekamela yothene ya kolooru, nto etampi anyu enkhala y'exariya mwaha wo wira Mukuttho wa xariya onnoolipelelani vale.

Okathi onrw'aka omuratthini woomaleloni wa
nihiku,
Nto itheku sookiserya sa oxanka simanleene
oruma;
Wookhala muupuwelo onikitthapiha ni
onikhaliha murim'aka wootteeliwa,
Nkinrowa okhala oomulapuva Yordani
meekh'aka.

⁴⁴⁹ Eyo ethhu emosa yooreera. Eyo ethhu emosa yooreera. Nrikina wo omulapuva. Nimosa wa mahiku awo, ninoorowa ophiya wookiseryani w'ephiro. Nsuwa ninookhootta waarya, nto Muluku onimwiihana.

⁴⁵⁰ Atamu onoophiya amuttikinye Hawa, ni wira, “Oophentiwa, ela eri va. Ola okathi w'ovenya.”

⁴⁵¹ Hawa onimookola moonoo anvare Apeeli, aire, “Rwaakani, oophentiwa. Ola okathi w'ovenya.” Apeeli ononvara Sethi. Ni Sethi ononvara Nowe. Nowe onvara. . . Oh, siiso erowaka, erowaka mpakha Abrahamu, siiso erwaasaka. Onookhala othukumela wuulupale ni ovenya okathi Mwaana a Muluku onrwaawe. Ninrowa okhala oolikana ni Yoowo nihiku nlo.

⁴⁵² Vano, nyuwo mwairaru etampi va, nyuwo munoorowa oliva mwaha wa yeeyo. Miyo kookhalana. . .

⁴⁵³ Enoothikela erwaaka mmuupuweloni mwaka, kihaana ohimya tu. Koophavela okakha, imaara xexe wala thanu. Kihaana ohimya. Akavi animuupuwela munn'ola, pasture, aakhalaka nno okereja wa Muluku? Munna, osulu nno, nsina nawe aari pani? Aavaraka muteko oVorgang iwe. Oh, nyuwo othene. . . Ekereja Yoopacerya ya Muluku, wenna nno vanloothoni. Ahiiso, aatumihaka Rawleigh's okathi wa—woothowa musurukhu. Mulopwana mmosa a omuluku, santu. Munna Smith khukuxa opuro awe osulu iwe. Kinooromola nsina nawe muhina mwa minuutu vakhani. Owo aari mutthu a Muluku ooponwe.

454 Muupuwele, nyuwo mwaahikupaliki ottharuxiwa, nto khunaira etthu yoovonyeya ntoko muKristu, Muluku onimoolopolani. Vano nto mwaahikupali olopoliwa, Owo onimookumihani mulaponi. Ti yeeyo Owo iiraly'awe.

455 Munnuupuwela, mBibiliani? Nkawehani ekereja y'aKorinto. Owo aahimenrye etthu yaary'aya, vooপুরoni, mwa Kristu. Masi owo aahaalopola mwaha wa etthu yaarowa okhumelela. Nto awo yaahiittharuxa, yaahookololiwa, ni Muluku.

456 Nto munn'ola mwaamukhaani, owo aari munna mmosa oottittimiheya, kookupali, mutthu mmosa a Muluku oowoopowa. Nto owo aahiphwanya muteko ohitto nno o... oVorgang's. Vakhala wira amosa-amosa a atthu awe akilanthe vaava, kinroromela wira khamunuupuwela wira miyo...miyo nkinoosuwelani mwaakilanthe-ene vaava. Masi, Ramsey, Munna Ramsey, akavi animuupuwela Munna Ramsey nno Ekereja ya Muluku? Tthiri, munnimuupuwela, mulopwana mmosa oothamaleya. Nto owo aanirwaaka owaani ni naanivaanelaka vamosa, vano naanikilaathi vale ni wunla n'uvarelana matata mmosa ni mukhw'awe; muKristu eekeekhai.

457 Nihiku nimosa miyo kaahirowa weiwe, kammala-ru orwa kikhumaka ilapo s'okhopela vamuthukumanoni, kaahiroiha ekaaro aka owehawehiwa, Munna Ramsey khwira, "Kiwiireleni exeeni, Billy?"

458 Miyo khwira, "Nkawehani, Munna Ramsey. Mwaakakhanye makhura."

459 "Vaareera," owo khwira, "ayo, vaareera." Khwira, "Mwaahikhalana muthukumano wooreera?"

460 Miyo khwira, "Oh, Munna Ramsey, waari wooreera." Miyo khwira, "Kaanithuna mwaaronwe ni miyo okathi mmosa. Muhinrowela-ni ni miyo?"

Owo khwira, "Miyo nkinaarumeela-tho Apwiya, Billy."

Miyo khuwehaweha, khwira, "Muhimye exeeni?"

461 Owo ntoko iirale, "Miyo nkinaarumeela-tho Awo," khurowa.

462 Miyo khuupuwela, "Oh, owo onoorukuneya tu." Miyo khutthikela kiiraka, khurowa nipuro nlo.

463 Khutthika khukela mukaaroni mwaka. Miyo khuphiya owaani, nto kipacerya wuupuwela yeeyo, "Miyo nkinaarumeela-tho Apwiya."

464 Apwiya khuhela vamurimani vaka otthika omukoha-tho. Vano, miyo khwira, "Meda, mwiilipihe saana tu."

465 Vano miyo khuwela, khukela mukaaroni mwaka khutthika, khweemela-tho, khuvolowa oVorgang's. Miyo khwira, "Munna Ramsey, kintthuna kookoheni etthu emosa."

Khwira, "Vaareera, Billy, exeeni iyo?"

Miyo khwira, “Nyuwo muhimmye, okathi vakhani ovinre, wira nyuwo khimunaarumeela-tho Apwiya. Nyuwo mwaakiirela iperwa paahi, kahi siiso?”

Owo khwira, “Nnari.”

Miyo khwira, “Munna Ramsey, nyuwo—nyuwo kahi yeeyo munihimy’anyu.”

Owo khwira, “Ayo.”

Miyo khwira, “Nyuwo khimunaaphenta Yaawo?”

Owo khwira, “Vaakhanle wira kaanaaphenta Awo, kaamwaarumeela Yaawo, nkaarowa, Billy?” khurowa.

Miyo khuupuwela. “Vano, Munna Ramsey!”

Khwira, “Nkinthuna olavula-tho yeeyo.”

⁴⁶⁶ Miyo khurowa owaani, khuvolowa okatthi, khuwala mukhora. Nto, oh, moosuwela moota muniisoon’anyu olemela saana, ntoko wira mmwaakhale ipulaxa mwaana wala etthu, moosuwela. Miyo—miyo khuupuwela, “Exeeni? Kheniweryaneya okhala. Vekeekhai yoomukhumelela etthu Munna Ramsey.”

⁴⁶⁷ Nto ookhala mwammiravo mmosa ooriipa, onihaniwa Jimmy, owo onnoorwa va okereja. Aarina mwetto mmosa, moosuwela; owo onootuhunya, ntoko siiso. Kinooliyala nsina nawe, onvara oVorgang’s, oneettiha ekuruwa. Owo aahikumana ni miyo, nto owo khwira, “Nyuwo moosuwela, Reverendu Branham,” owo khwira, “Miyo nkinsuwela ya yeela va Dr. Ramsey nno.” Owo khwira, “Miyo koomuleela, nihiku nlo, wira, ‘Hiyo othene naamoova hata otthukula eyano ahu va.’ Khwira, ‘Nyuwo mwaari mutthu ooreera murima.’ Masi” khwira, “Owo khukuxa elisensa awe ya mulaleyi khurowa vattankani khukherakasa, khurihela mutt tankani, khwira, ‘Miyo nkinthuna okhala nnaata ni yeeyo-tho.’”

Owo khwira, “Hey, mwenye!” Khwira, “Khivaatthuneya nyuwo wira yeeyo.”

Owo khwira, “Oh, Jim, miyo koophweeleya waarumeela Apwiya.”

Vano owo khukelela ohoolo, khwira, “Khamunihimya ekeekhai.”

⁴⁶⁸ Ni khwira, “Vano owo khukiirela, wira aamurowa olokiha ivaavula sawe, Nihiku n’otthapela Muteko,” kookupali wira ti naary’aya. “Nto owo khwira, ‘Vano, miyo kintthuna wira nyuwo murwe mukikhaliherye, Jim.’”

⁴⁶⁹ Owo khwira, “Kinimookhaliheryani kahokolowa-ru okereja, masi yoopacerya kinrowa okereja.”

⁴⁷⁰ Khwira wira aahitthika, “Nto Mwenye Ramsey aalokiha ivaavula mukaaroni mwawe. Owo khwira, ‘Jimmy, mulapuwe muratthi. Ikantiina soowaliwa nno. Mulapuwe muratthi mwakiruuhela ekaaxa emosa ya saravexa.’”

471 Owo khwira, “Mwenye Ramsey, miyo kinnitthekaka mwa itthu sinci-ene, masi nkinkhalakhala kitthekaka wa omuruuhela murumeyi a Apwiya ekaaxa ya saravexa.” Owo khwira, “Nnari, mulopwana. Miyo nkinkhakhala kiiraka eyo.”

472 Nto owo khwira, “Ahe, muroweke. Murowe mwaruuhe, Jim.”

473 Owo khwira, “Mwenye Ramsey, kinoolokiha ivaavula sanyu. Masi mwamutthuna saravexa, murowe mwamukuxe mmansinyu.” Owo khwira, “Nkinrowa nnakhala omuruuhela murumeyi a Apwiya etthu p’itthu ntoko eyo.”

474 Vano Ramsey khuwela mukaaroni mwa Jimmy, khulapuwa muratthi; khutthika, oohapaliwa nuusu, ni ekaaxa ya saravexa, anwuryaka.

475 Owo khupacerya olamwa, ni owereiwa. Munnona? Muluku khaawerya olavula ni yoowo. Miyo kaahimulopola, kaahiira sothene saawery’aka. Munna Smith aahimurrowela khimulopola. Athu othene yaahiphavela wira itthu sothene saawery’aya omwiirela. Nnakhala vo, owo aattikinya muru awe. Exeeni yiiraneiyey? Owo aahiwereiwa khukhwa. Eyo yooniherya wira owo aari mutthu owoopowa. Vakhala wira Muluku khaawerya omukhalihya. . . omuruuhela okhala oowiiwelela, Owo aahaana omukumihya mulaponi omuruuha Owaani. Eyo vekeekhai t’ile Bibilia ohimmy’awe. Ti yeeyo Bibilia onilaihery’awe. Mwahivileleke ottharuxiwa, muhaana otthikela Owaani.

476 Tivo Muluku khokhanle woopwetexani Owo omanle-ene owoopolani, masi Owo pooti okhuveiha mahiku anyu mu, ni woolivihani mwaha wa khula etampi mwiiraly’anyu. Tivo, mwaira etampi, munoorowa okhala ooliva mwaha w’etthu mwiiraly’anyu. Muupuwele yeeyo paahi.

477 Vano, vano Apwiya akhale ni nyuwo. Miyo kookupali, ohiyu ula, wira Munna Ramsey ohoopowa. Vekeekhai, miyo kinnamini iyo. Masi owo khaatthuna omwiiwelela Muluku paahi, nto okathi owo ahaamwiiwelel’awe Muluku, Muluku aahaana omuruuha Owaani. Eyo t’itthu emosa yo wira, okhala wira, yaari exeeni? “Owo aamuruuha oveehiwa ni otakhaliha Ephome yeeyo owo oreerihaniw’awe.” Eyo ekeekhai? “Ni okhaliha waataana etthu yoonanara,” vakhala wira vekeekhai eyo kehiyo ele ewarakha y’aHeperi ila ehimaly’aya. Munnona? Yaamukhala yoohiweryaneya owo opweteya, masi aamuruuha ehaaya ni etakhalelo, tivo Muluku aahaana omukumihya mulaponi ni omuruuha Owaani. Vekeekhai ti yeeyo yaakhumelenle.

Vano Apwiya yooreeriheni, nuuramihaka muru ahu okathi vakhani wira nivekele.

478 Vano, Tithi oowaarexa ni ooreera murima, hiyo khanireere woouxukhuruni Nyuwo mwaha wa natiri nirin’ahu, wira Nyuwo khamunkhalakhala munihiyaka wala oninyanyala. Nyuwo moohimya wira Nyuwo mwaamukhala ni hiyo mwa ekumi, ni mookhwaani Nyuwo mwaamukhala vakhiviru ni hiyo. Nyuwo

moonilaiherya wira naahikhalana Ekumi Ehinimala. Nyuwo moonivaha Eyo mahala-ene. Khanikhanle opwetexaka Eyo. “Othene ole onoorwa wa Miyo, ookhalana Ekumi Ehinimala.” Nto yakhala Ekumi Ehinimala, Eyo kherina emalelo, ni Nyuwo moonilaiherya onihihimuxa nihiku nookiserya. Wa yeela hiyo khaninreere oxukhuru. Hiyo ninnixukhuru wira Masu Anyu anninixuttiha yeela. Awo anninivaha nrromelo woolipa. Eyo ennisuweliha wira Atith’ihu Mphentoo. Awo anniniphenta, ni Awo aanithanla. Nyuwo muhimmye wira, “Nyuwo khamukithanlale Miyo, masi Miyo kihoothanlani khookhalihani.” Ni miyo kinnooxukhuruni Nyuwo, Tithi, okhala wira Nyuwo muhiira siiso. Ni anci-ene akilanthé va, ohiy’ula, ni atthomeliwe Ekumi Ehinimala, ni amwaakhenle Yesu Kristu okhala Moopoli aya yaawo. Ni mihokorokho sa Erooho sintthara makhalelo aya: ooreera murima, owiisumaaliha, owiiveviha, ophenta, ohakalala, murettele, ovilela, oreera murima. Hiyo ninnixukhuru mwaha wa yaawo.

479 Nto ninvekela, Tithi, wira yaakhanle-ene akina mu, ohiy’ula, ahirina mihokorokho iyo saattharaka, masi ammumula vasulu v’etthu y’ethiru, okhala wira yaahiiveriha, nihiku nimosa, okhala wira yaahikhala oowuukhuwa, yaahooná oreera, siiso yaakhuwenle, siiso yiirale itthu sinci-ene. Masi, Tithi, vakhala wira awo kharina muhokorokho wa Erooho, onaakhaliha nihiku ti nihiku mwa mphentoo woohihyererya, yaalelevelaka awanani aya, elakiheryaka soovonya saya, ni ekhalaka a murettele ni ophenta, ni oosivela ni ooreerelana murima mmosa ni mukhw’awe, ni wiivahererya wa Ekereja, ophenta mwaha wa Kristu ni w’ana Awe, O Muluku Ohinimala, mwaalevelele. Hata ekhalaka mamempuru a ekereja, mamempuru a erutthu ya vathi, awo erowe vano ni ehiye miteko iyo, s’erutthu sookhwa, ni yiilipiheke mpakha oloka voomalela. Munivahe, Pwiya. Wira awo erwe wa Ole ooloka voomalela ni emwaakhele Yoowo ntoko mukuttho aya w’ottipiha itampi saya, wira Owo eemele ntoko mukuttho wooloka wa mulopwana oottheka ni muthiyana oottheka. Ni mwaavahe mahala Awe a ophenta ni murettele, mpakha awo orwa Ohoolo wa Muluku wira akhaleke mahiku othene. Munivahe, Tithi.

Nirina-ene miru sahu soowuurama:

480 Aakhanle-ene mmosa aatthuna waakakhanya ekumi ya mw’erutthuni ya sooruma, ya opatiiso, iyuukhuwelo, ya itthu sikhaani s’erutthu ntoko seiyo, ni murima w’ekeekhai woosareya ophenta w’ekeekhai, yoowo—yoowo mwaarow’anyu owerya omurowela nwanan’inyu ootakhalexá, ompweherya miyoono sanyu ni wira, “Munna, miyo kinimoovekelelani. Miyo kinnoophentani.” Nyuwo mwaatthunaka waakakhanya musuwelel’owo wa itthu s’erutthu ni musuwelelo w’ekeekhai wa ophenta, mwaamutthuna onvenxerya ntata nanyu Muluku, ni wira, “Muluku, mukikuxe ohiy’ula, mukikhalihe ele

yaatthuneya wira kikhale”? Miyo kinimoovekelelani, okhuma vapulpitu vaava. Munnitthuna mavekelo? Nvenxe matata.

481 Muluku ooreeriheni ottuli iwo, mulopwana. Muluku ooreeriheni, munna. Mutthu mukina tho? Muluku ooreeriheni, mulopwana. “Miyo kinnikhalaka mukereja mwa miyaakha sinci-ene.” Muluku ooreeriheni, mulopwana. Muluku ooreeriheni va, munna. Muluku ooreeriheni ottuli iwo, mwamuthiyana. “Miyo kinonvekela Muluku wira akikhalihe a murettele.” Nyuwo mu. . . Nyuwo muri vekeekhai ooviruwa? Muri ootapanyeya? Munoohoverya? Munookakheliwa khula epantte? Munimwiikoha vakhala wira Eyo tthiri ti y’ekeekhai wala nnari? Mwaarwaaka wa Kristu, munn’aka ni olipa woomalela, murima woosareya ophenta? Munrowa wa Yoowo woohikhala hata woova, mwiiraka, “Miyo koosuwela wira Awo t’Atihi aka”?

482 Ni khuuvo olamuliwa, moovira mookhwaani khuphwanya Ekumi. Nyuwo moosuwela. Nto nyuwo munniveha makhalelo anyu: nyuwo munniphenta, nyuwo munnilevelela, nyuwo mwa ooreera murima, nyuwo mwa a murettele, nyuwo mwa owiisumaaliha. Mihokorokho iya sothene sa Erooho sinnitthara makhalelo anyu, nihiku ti nihiku. Mmalaka-ru wira ethu p’itthu yoonanara, oh, wulu, emalaka-ru orwa mmuupuweloni mwanyu wira muhiira yoonanara, voowaakuva munnilakiherya, naanaano vaavo. Khamunlipelela minuutu mukina, munoorowa naanaanoru khulakiherya. Mwaahilakiherye, ahe, khamurina Erooho ya Kristu. Nyuwo pooti okhala muthiyana ooloka, pooti okhala mulopwana ooloka, pooti okhala oowuupuweliwa saana mukereja, pooti okhala oowuupuweliwa saana wa namwaattamanani, masi moorowa mpakha oloka iwe voomalela, nipuro nle munkhal’anyu voomalela oororomela mwa Kristu? Nto mwa yeela, woovahani ekanyeryo. “Abrahamu aahimwaamini Muluku, vano khukhalihwiwa naxariya. Vano Muluku khunvaha ekanyeryo ya olyihiwa masoma, ntoko mulipiheryo.”

483 Vano nyuwo muniira, “Miyo kinnimwaamini Muluku. Miyo koolapa.” Masi Muluku ohoovahani ekanyeryo ya Erooho Yoowaarya, mmakhaleloni mwanyu, a ophenta, ohakalala, mihokorokho sa Erooho, wira yooniherye wira muhoopowa? Owo aahiire eyo, wesu Owo khonatthi waakhulela waamini wanyu nlelo. Nyuwo muroolapa paahi. Owo khokupanli, yookhala ethu evonyeiye. Mwaamutthuna omwaakhela Yoowo, nto? Nvenxe ntata nanyu, aakhanle-ene mutthu mukina, nihinatthi ovekelo.

484 Muluku ooreeriheni, mwamuthiyana. Muluku ooreeriheni ottuli iwo, nave. Muluku ooreeriheni. Vaarera. Mutthu mukina tho, nihinatthi ovekelo? Vaareera. Muluku ooreeriheni, ottuli iwo, munna. Muluku ooreeriheni, munna. Muluku ooreeriheni, munna. Muluku ooreeriheni, munn’aka. Ti yeeyo. Matata muloko, muloko ni mathanu aavenya.

Vano nrowe nivekele.

485 Muluku oottotopeliwa, vakhukuluni vaya, awo ammurowela altaari. Ti vakhukuluni vaya, vatthu awo akilanthi aya naanaano va, wira Nyuwo moolavula ni mirima saya, wira awo “aavonya.” Ti vakhukuluni vaya Nyuwo muhenly’anyu otthuna mmurimani mwaya, wira awo “annitthuna okhalaxa ntoko Yesu.”

486 Awo antthuna ekumi aya erukunxiwe. Awo antthuna okhala owiisumaaliha ni owiiveviha. Awo antthuna okhala ooreera murima ni oosareya ovilela. Awo antthuna okhala oothunku, oovilela. Awo antthuna ekhalaxe ntoko Kristu, ntoko Kristu, mpakha olumwenku onrow’aya wira, okathi aneett’aya mphironi, “Mulopwan’ole vekeekhai muKristu. Muthiyan’ole vekeekhai muKristu. Oh, awo athu oomalela oreera murima, oowiimaaliha, oosivela!”

487 Munivahe, Pwiya, wira awo yaakhele musuwelelo yoowo, ohiy’ula. Ni wira ehikhalakhale emumulaka vasulu va owerya wa ekerej’aya, vasulu va wiitakaniha waya ni khula ekereja, khula muromolelo; wala nnakhala vasulu va iyuukhuwelo saya, vasulu va khula yoowupuwelela, ntoko yoothananiha, etthu ekhumelenle; awo pooti ekhuwenle-ene, elavunle-ene ilavulelo, wala etthu ekina.

488 O Muluku Ohinimala, muhaahiye awo weererya oromela ovolowa Wirimu vasulu va yeeyo, maana hiyo nihoona eyo imaara sinci-ene ovonya vootakhala-vo. Ni Nyuwo moohimya wira yaamuvonyeya, “Hata sikhalka ilavulelo, sinoomala! Vari ilaleeryo, sinoolakaseya. Vari osuwela, owo onoolakaseya. Oh, vaavo itthu iya sothene siry’aya, hata soovaha, miiriirya s’ovoniha, sothene iyo sinoorowa omalamala. Mphento ole w’oMuluku paahi t’unrowa ohala.”

489 Muluku, mukhalihe yeeyo mmurimani mwaya, ni mwaahiye esuwele wira eyo Erooho yeeyo eniruuha mihokorokho. Mwiire naanaano va, Pwiya, noolipelelakani Nyuwo, maana ninvekela mwa Nsina na Yesu. Amen.

490 [Nipuro vahiitthu mufiitani—Mol.]...apoola a mooro evavaka, ni woona masiya evavaka nno ni nno mpaani, omoona Kristu avolowaka ni miiwa mmatatani mwAwe, ni mwAwawe . . . Oh, mwaahisuwela wira nlo ntapha na nwanani a Kristu? Owo oohimya, “Itthu iya sapacerya-ru okhumelela, vano nwehe osulu, ovuluxiwa wanyu ori vakhiviru.” Vano mwaha wa yeeyo vankisivel’aya okhanyererya ekereja khula minuutu kinwery’aka, ni wookhalihani oolipa. Munna Neville pooti ohikhala ni hiyo okathi wothene. Kookupali wira Munna Neville mwiixuttihi ooreera murima, mukumi a Ehapari yooreera. Hiyo khanisuwenle exeeni enrowa otthukula ephiro yo okela vapulpitu va, ni, yaphiya va, “Ipwittipwitthi Saka sinnisuwela Nsu Naka.” Mukhale ni Masu awo. Muhikhalakhale muhiyaka

Masu awo. Mukhale ni Yaawo paahi. Ni mukhale oolipa mwa otaphuwa weiwo Kristu ookhalinh'aweni ootaphuwa. Muhikhaleke vathi va mapixi awo othene a opottha ni sikina. Mukhale oolipa, ni mukhaleke ootaphuwa. Muluku onimooreerihani. Hiyo kharina hat'etthu molumwenkuni wira nooveke.

⁴⁹¹ Nyuwo okathi wothene munimwiikoha. Kinnaaweha athu orwa wira evekeleliwe, anookela voowoka muliinyani. Okathi woottharelana awo animoona ekampaanya y'ovoniha, awo anookela eliinya *ela*, awo anookela eliinya *ela*. Miyo nkiniwuulumela. Awo amphavela ophwanya ekhurunuwelo murima, masi awo aniira mwa enamuna yoovonyeya. Nyuwo muniira voovirikana, ele Muluku ohimmy'awe wira muhiire. Munnona? Mwaarowaka voororomela Veehiceni va mahala, ni mwaaminiki, wira, "Nvekenly'anyu, munimwaakhela," mukhale ni Yeeyo. Eyo t'inamuna eniriw'aya; kahi paahi okhuma misawu murowaka misawu, okhuma ekereja mpakha ekereja, ekampaanya mpakha ekampaanya.

⁴⁹² Vano, awo aapaka ikampaanya iya so ovoniha ntoko nikhuru na ithiru. Vekeekhai, awo aapaka. Yoophiyerya nipuro vaavo, athu oosuwela, anwehaaya ni wiikoha yothene eyo ti ya xeeni. Ayo, Muluku khonthuna itthu iyo. Ovonihiwa khorina w'okhala mukampaanyani. Ovonihiwa waahaana okhala mwa khula ekereja ya vaavo, soovaha sothene iya sivaraka muteko. Masi muhiroweke waala mwa soovaha iyo. Muhikhale ooxikha yoovaha. Vakhala wira Muluku ontthuna woorumeelani mwaha w'etthu, Owo onimwiira. Masi, mumphavele Nanvaha.

⁴⁹³ Martinho Lutero, emaara emosa vaamanly'awe olavula ilavulelo, owo aahikohiwa mwaha wa xeeni ahaalaleery'awe yeeyo, owo khwira, "Kaalalenrye yeeyo, athu aka yaamurowa ophavela yoovaha omuhiya Nanvaha." Eyo ekeekhai.

⁴⁹⁴ Moody, emaara emosa, alavulaka, ni khupacerya, okathi waalaley'awe ni muupuxeryo saana, owo aahilavula ilavulelo. Owo khwira, "Muluku, mukilevelele mwaha w'okukuma moolumo oovahuwa." Vekeekhai. Munnona? Ni awo yaahikhalana itthu iyo. Hiyo ninnaamini itthu iyo, masi iyo sihaana oheliwa voopuroni vaya. Ni iyo sihikhaleke ntoko iyooniheryo.

⁴⁹⁵ Khiivo etthu emosa ehiiwe mBibiliani, ntoko "eyooniheryo ya Erooho Yoowaarya," mihokorokho sa Erooho paahi. Mphwanye khula nipuro Yesu ohimaly'awe siiso. Ayo, mulopwana. Eyooniheryo ya Erooho Yoowaarya ti muhokorokho wa Erooho anyu. Yesu ohimye siiso, "Ni mihokorokho saya munimwaasuwela." "Ni muhokorokho wa Erooho ti ophenta, ohakalala, murettele, ovilela, oreera murima, murettele, othunku, wiisumaaliha. Nto muhokorokho wa nwanani ti owanani, onyokhana, otakhala murima, ohiwanana, ni sikina;

owo ti muhokorokho wa nwanani.” Tivo, munoowerya olamula mwaha wa enamuna onkhal’anyu, nipuro mweemenly’anyu ni Muluku. Vakhala wira murim’anyu wothene ti woosiveliwa ni Yoowo, ni nyuwo munnimphenta Yoowo ni mwa ooreera murima, ni munkhala ni Yoowo khula nihiku, moosuwela wira moovira mookhwaani khuphwanya Ekumi. Yaahikhale, vano nyuwo mwa enamuna ekina, nyuwo munimutakiherya paahi muKristu. Ti yeeyo. Yeeyo, mitakiheryo sothene s’erutthu vekeekhai sinrow’aya woonelihiwa. Hiyo noosuwela eyo.

⁴⁹⁶ Tivo, muhikhaleke enamuna yeeyo y’ekumi, khamurina y’okhalaka. Xeeni mwaarow’anyu okupaliki erantteliho, erimu yothene osulu esanrye-ene ele yooreera ni y’ekeekhai? Vekeekhai. Mukihiye kimukuxe Muluku, ti yeeyo kintthun’aka. Amen.

⁴⁹⁷ Vano, ookhala mutthu orwiiye wira avekeleliwe? Nyuwo mwaarwiiye-ene nvenxe ntata nanyu. Hiyo naahikkhalana muteko wo ovoniha voosiis’ula. Kinoona wira nto. . . Muhan’ola va? Vaareera, munna, mwaamuwerya orwa ohoolo nto? Ni munn’ihu, humu, va, onimoorwa vano wira attikitthele. [Nipuro vahiitthu mufiitani—Mol.]

. . . waarye mwa miyo;
Oh, waarye mwa miyo, Pwiya, waarye mwa
miyo,
Waarya wa eforora waarye mwa miyo.

⁴⁹⁸ Owo kahi oothamaleya? Nrowe nuuramihe miru sahu paahi, vooamaaleya saana vano. Nto, *Waarye Mwa Miyo*, emaara ekina. Vano, nrowe vano, atthu othene, wira, “Waarye. . .” Mmukokhorele Yoowo paahi mmunepani mwanyu vano, moone, mukhale oomaala. Muteko w’ovoniha onimoorwa. Mutthaka woomala. Nrowe nikokhorele.

Waarya wa eforora waarye mwa miyo;
Oh, waarye mwa miyo, Pwiya, waarye mwa
miyo.
Waarya wa eforora waarye mwa miyo.

Okhala ntoko Yesu, okhala ntoko Yesu, (Oh!)
Mulaponi miyo kinwehererya okhala ntoko
Yoowo;
Mukwah’aka wothene mulaponi mpakha
Movuwani,
Miyo kinvekela paahi okhala ntoko Yoowo.

Ninrowa weetta moWaaryani, Waarya
wooreera,
Murwe vaavo mattoitto a ikharari anaary’aya;
Anaarya mwa hiyo, othana ni ohiyu,
Yesu, Waarya wa mulaponi.

Nyuwo masantu othene a Waarya mulaleye,
 Yesu, Waarya wa mulaponi,
 Nto isiinu sa Wirimu sinooruma,
 Yesu, Waarya wa . . .

Munaakhele, Pwiya, okathi onookokhorel'ahuni Nyuwo.

Ninrowa weetta moWaaryani, Waarya
 wooreera,
 Murwe vaavo mattoitto i ikharari anaary'aya;
 Anaarya mwa hiyo othana ni ohiyu,
 Yesu Waarya wa mulaponi.

⁴⁹⁹ Khonoosivelani okukuttheya iwo? Munnoona oreera?
 Nvenxe ntata, muhimye. Yookhala etthu emosa wa masipo ale
 a khalayi, nsipo na khalayi, Kaamwaamputi okhalana yaawo
 ovikana masipo ala othene a vano a molumwenkuni aruuheliwe,
 ni mukereja s'eKristu. Ankisivela a khalayi, okisivela.

Yesu, mukikhalihe vakhiviru va mwiikimanyo,
 (Wulu!)
 Vaavo ephattuwelo yoosarya,
 Ya mahala wa othene, muro woovoniha,
 Onikhwalala ephattuwelo y'oKalvario.

Vamwiikimanyo, vamwiikimanyo,
 Oh, okhale ovuwa waka;
 Mpakha munep'aka okuxiwa khuphwanya
 Omumula omurathini.

⁵⁰⁰ Kaamuwerya okhuma molumwenkuni vookhweya-
 vo okathi nniipiw'aya nenlo, khamwaawerya? Moota
 ereeraly'aya! Yoomaliha mwaha? Moosuwela, kootteeliwa
 murima mwaha w'omaliha sothene iya, ankhi nyuwo? Ekontha
 ya khalayi yothene yoolinwa, okathi munci-ene khalayi.
 Miyo kaahimuleela Owo, "Pwiya, nkinthuna hata mulattu
 omurathini. Miyo—miyo kintthuna kikupali naanaano va."
 Kintthuna kimusuwele Yoowo. Kintthuna kimusuwele Yoowo.

⁵⁰¹ Yookhala ehimye yuulupale, yooriipela eri ohoolo wa khula
 mmosa a hiyo. Ninrowa ephiro yeeyo. Khula okathi murim'ahu
 omman'aya, hiyo ninootepa naattamelaka naattamelaka.
 Masi kaphiya iwe, nkinthuna oripithuwa ntoko namoova,
 kintthuna kiiputaputele mmalayani mwa exariya Awe, okela-
 mo, kisuwelaka ela, wira, "Miyo kinnimusuwela Owo mwa
 owerya wo ohihimuwa Wawe." Wira, Owo aihana-ru, miyo
 kinookhuma eriyari ya alipa-ookhwa.

Awaka . . .

⁵⁰² *Waamini Waka Onweha Wa Nyuwo*, nrowe niipe vano.

Waamini waka onweha wa Nyuwo,
 Nyuwo Mwaapwittipwitthi a oKalvario,
 O Moopoli a Muluku;
 Vano mukiiwe okathi onlomp'aka,
 Mukumihe itampi saka sothene,
 Muhikihye nnakhala kikhumelaka
 Ottaiwene wa Nyuwo.

⁵⁰³ Vano, Musomiha muulupale, ntoko Nyuwo sinniixuttih'anyu mwa Masu Anyu ooreeraxa, mirima sahu sinoothukumela paahi, ni mahala a okuxiwa, osuwela wira hiyo noovira mookhwaani khuphwanya Ekumi. Sothene mwaha wa oreera murima wa Pwiy'ahu Yesu, Yoowo oniihanne, ni khunirapiha Mphomeni mwAwe, ni ooniruuha ohoolo wa Ehice ya Muluku, oohivonya, oohittheke, maana Owo ookuxa itampi sahu. Hiyo khanirina etampi. "Muluku ompweherya soottheke sahu hiyo othene mwa Yoowo, ni Owo ohaaxeriwe mwaha wa soottheke sahu." Oh, moota onimphent'ahu Yoowo, Mwaapwittipwitthi muulupale a Muluku!

⁵⁰⁴ Nto ninvekela, Tithi, wira Nyuwo munivahe nuulumo, soohimya, wira niwerye waaleela akina, wira n'awo, ewerye omusuwela Yoowo, ni emphenteke Yoowo, maana Owo onnaaphenta. Munivahe mahala ala.

Ni kooxukhuru, Tithi, mwaha w'anamwane anaamuyariwari amanle okela Momweneni mwa Muluku. Awo aphwanye ekereja yooreera ya owaani nipuro nlo, nto weiwo yoorumeeleni Nyuwo mpakha okhwa waaleve okhuma erutthu ila ya khalayi ya ohaaxeya ni iwereyelo, ni aruhiwe ohoolo Wawe, oohivonya, oohittheke, wa okathi onrwa, ni Ekumi Ehinimala. Vano hiyo ninvekela mwa Nsina Nawe. Amen.



AHEPERI, EKAPITULU YA NEETHANU NA MOSA ² EMK57-0908E
(Hebrews, Chapter Six ²)

ITTHARANELO YA ELIVURU YA AHEPERI

Mutthak'ola wa Munna William Marrion Branham, opaceryawene olaleeriwe ni Enkelesi Ettiminku ohiyu, mahiku yeetaka 8 mweeri wa Setembro, 1957, oBranham Tabernacle oJeffersonville, Indiana, wAmerika, okuxiwe wo okaravariwa mufitani ya makineti khulempwa wothene ni nntaava n'Enkelesi. Otaphuleliwa nno mw'Emakhuwani okhumiheriwe ni okaiwe ni Voice Of God Recordings.

EMAKHUWA

©2023 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Olopolo mwaha wa ihaakhi sa mwaneene

Ihaakhi sothene sinnaakiheriwa. Eliivuru ila pooti otthittiwa owaani wira mutthu arumeele wala okaiwa, voohilinwa etthu, ntoko ekaruma y'olaleerya Ehapari yooreera ya Yesu Kristu. Eliivuru ila ehitemihiweke, otthittiwa eyaattelo yuulupale, oheliwa muwepisaiti, oheliwa moothukumanyiwa wira ekuxiwe-tho, otaphuleliwa ni mattaava makina, wala orumeeliwa wira ophwanyiwe musurukhu vahikhanle n'utthuniheriwa woolempwa ni Voice Of God Recordings®.

Mwaaphavelaka wiiwa-tho wala ikaruma sikina sikhanelle, xontte mulavule ni:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org